



26-186
4041
114



114



國朝耆獻類徵初編卷百二十五目錄

詞臣十一

鄭江

黃之雋

邵泰

蔣恭棐

儲大文

吳啟昆

陸奎勳

夏力恕

李鍼

于振

戴瀚
楊炳

沈淑

張江

王步青

何玉梁

陳浩

張鵬翀





國朝耆獻類徵初編卷百二十五

通奉大夫前署江西巡撫江西布政使司布政使湘陰李桓輯

詞臣十一

鄭江

箕谷先生鄭氏諱江字璣尺浙之杭州府錢塘縣人由康熙戊戌進士改庶常授檢討同修明史再參一統志局事遷贊善提督安徽學政遷侍讀以足疾乞解官先生讀書務心得不從事於詞華貌寢又不喜事威儀望之無足動人然胸中粹然醇然不設城府待人以忠信有一得之善好之不啻自其口出三館儲才之地多皈依當路以求速化先生淡然無求回翔書局者廿年未嘗有積



薪之憾見於詞色門巷蕭然客至烹茶相對而已和碩果親王嘗
欲延賓客同官求之者如雲桐城方學士望谿以先生薦力辭不
赴及持節江介歸方將進用而蹇不任行韓大夫之患墮車蓋有
命焉初先生官京師嘗欲纂注春秋至是遂成之屹屹不舍時扶
杖出與諸故人爲詩祗倡酬極盛不謂其遂卒也先生平日自視
欲然其在儕輩似不能言者故未嘗輕與人言學然而知學者莫
如先生未嘗輕與人出其詩古文詞然而知詩古文詞者莫若先
生嘗與予私論諸儒之學謂康節實出老莊之緒餘飾之以焦京
之術數世特以二程推之遂列之六先生之目宋史登之道學可
一笑也謂陸王宗旨豈可妄詆世之擁戴朱子者攻之耳東萊尙

不敢斥陸涇陽非王而未嘗不有取於王而蚍蜉之撼何爲乎不
謂顧亭林亦蹈此習又謂蔡虛齋固善人然惜其學之陋也因文
見道已屬膚廓豈有因帖括講章之文而見道者使今世橫目二
足之徒挾兔園冊以論學則蔡氏爲之厲也先生向從義門何公
游義門墨守朱學者予意其不出師席之儲胥不料其嶽嶽不肖
苟同如此其所作詩古文詞稱情而出一任時風眾勢之上下確
然莫能溷其本色然細讀之正不輕下一字大類宋范正獻公涪
夫而世之以險語僻文相尙者所弗知也臨川學士穆堂嘗謂予
曰今館閣人物渺然如箕谷者真正始之遺蓋確論也予陪先生
杖履之末幾二十年辱待以忘年之契嘗一日數過予引爲畏友

及里居貽書告子約同事於春秋辛酉之秋子至杭開尊話舊自是不復再見矣生於康熙某年月日卒於乾隆某年月日曾祖某祖某父某累 贈贊善宜人某氏二子長爲鄉貢進士所著有箕谷詩集已行世葬於西湖之某峰子之爲斯文也以所獨知於先生者序之逝者如可作也其許我乎其銘曰
子於同館前輩之交方李謝萬暨先生而五年來睽隔強半老病山河道阻生者不可見死者已矣鬱鬱予懷其誰與吐

右墓碑銘全祖望撰

公姓鄭氏名江字璣尺晚號筠谷先世自唐時家於歙後遷浦江是爲義門由浦江遷餘姚之眉山曾祖少南以授經來錢唐娶於

趙遂家焉祖應科父茂坤皆以公貴 贈儒林郎公生有異稟五歲時卽知以海參屬對山藥九歲學爲詩未弱冠爲諸生試輒高等家遭回祿勢中落藉教授以奉堂上之養得其歡心癸巳 萬壽特恩開科以禮經魁其房是年試禮部不利畱京師學時文於長洲何翰林焯主大司農華亭王公家分修詩書兩經傳說彙纂戊戌成進士改庶常明年終養回籍旋居父憂未嘗一飾竿牘干當事時高安朱文端公方撫浙不日一往文端公以此見賞逮公服闋方補卽薦校順天鄉試徐尙書元夢教習庶常館試輒列公一等因奏充明史館纂修官是年以鄉試校閱公明議敘授檢討復丁母憂歸里巡撫李敏達公聘主敷文書院講席課士有法始

分生童校試日期終日危坐堂上嚴絕代倩傳遞之弊頗有以賄求錄者痛斥之最激賞者周玉章吳嗣富陸秩胡際泰卽連掇科第以去錢唐龔鑑以經學見契於公公尤重其學行果以選拔出宰甘泉頗著惠政服闋入詞館太宗伯吳縣吳文恪公奏充大清一統志纂修官文恪卒太宗伯溧陽任公少宗伯桐城方公總裁志局少宗伯見公文深相折服因以志事見屬時纂修者雖眾獨公與常熟王侍御峻屬筆最多壬子復分校京闈甲寅晉右春坊右贊善桐城相國薦公能爲古文 憲廟面諭有鄭江老實之旨乙卯爲典試事慎簡儒學之臣公在選同引 見者皆歷詢履歷至公獨不復問唯詢諸省文風孰優桐城相國以山左對卽 命

公往蓋受知有素矣公既承 恩命矢竭公慎殫心校士非極荒謬者必閱至終篇援筆點勘右腕幾脫竟以左筆終事搜剔落卷纖悉靡有遺憾闈中雖給事僕役莫不感歎試歸 恩命復使視學安徽躬親校閱標清真雅正之文爲正鵠險詭者槩從斥落風習爲之一變嘗謂人泮爲士子進身之始前茅廩餼所關敢不盡心乎檄州縣以廩餼對抵錢糧無糧者爲任親友抵納免出入耗折之患遇有案牘尤畱心究切青陽有娶未婚族嬖之武生已廉其實縣令再三請貸卒治其罪而離其婚賄貽袁生以祖任縣令時後官擔代銀兩與制府有私親檄州牧褫其衿公捐俸率錢代償而袁生不果黜巢縣監生樊珍以爭產誣其弟婦單氏及已婚

姪女樊氏與鄰人趙生通公閱牘而疑之下縣縣令受樊珍珠實其事通姦無所據惟以樊氏所執詩扇爲證佐則趙生所書唐人句也蓋趙生與單氏子兆賓同學是夏趙生書此扇單氏母女偶執之實無他公以縣審不實駭之督撫檄無爲州牧覆審州牧前嘗以私書瀆公因私憾欲妄褫一生公不荅而下府平反其事因是與公有隙欲借以傾公謗公受兆賓賄逮公役往質太守意不直之而公心跡始白然單氏母女之冤猶未白也公按試至廬力左之復言之撫軍先後兩臬司皆與公意合其事得釋而樊氏之舅諸生陳案因欲出樊氏公檄至面諭之得以完聚使節所莅凡名德之後貧弱不克自振者必委曲成全之諸生通古學者尤引

進不倦陶敬信之通經江有龍之史學皆特疏薦於朝有龍以親老辭敬信獻所著書關下與修三禮人皆服公之能知人也秩滿晉侍讀召對詢以方面大吏及所過地方情形次及江左人文屢蒙溫諭仍充明史綱目館纂修官公在江北時池州各屬地苦卑溼一雨則堂室皆水苔愔愔生榻上公久坐蒸溼中迨反命冒暑載馳熱雨蒸爍居一年足遂不良於行乞告回籍調理掌院固畱公且欲借修書爲公養疾之地公以食祿不朝賀非臣子禮力辭歸同館諸公祖帳都門外人賦一詩贈行數十年僅事也公所學無不貫尤邃於經謂春秋爲宣聖性命之文而三傳未能發明非啖趙孫劉諸大儒則聖經或幾乎晦武夷胡君頗以

己意武斷迂泛不切者不可殫述晚集諸家之說爲春秋集義二十卷穿穴根據不第爲胡氏諍臣也又爲詩經集詁四卷禮記集注二卷與修明史時有明志彙六卷明太祖本紀八卷列傳十卷修綱目時有明綱目三卷少學詩於同里洪稚畦中凡數變卒歸醇雅晚與里中諸宿老結南屏之社而公獨絕去破碎委瑣之習已刻筠谷詩鈔七卷余嘗承公命爲之序未刻者有書帶草堂詩鈔三十三卷文集八卷賦四六共一卷詞一卷其他若析醒錄三卷粵東紀遊一卷則公之雜著也公和而介通而有守官庶常時佟冢宰方總庶政同年薦公入幕不就或嗤其迂已而佟敗友人獲交於年太保爲公先容勸作詩以頌功德笑而不應方侍郎薦

公於果邱公力辭西林相國會薦公肇高雷廉學政終未嘗私謁通名仍用後輩禮不敢妄附門生之籍身旣通貴布衣之交四十年如一日後進有僞才折行輩接之稱說不去口余之交於公也時方踰冠而公已爲巨人長德歡然握手若昆弟暨余通籍而公又爲館中前輩片言之美一字之疑虛已下詢執禮如末學小生而不知涓流之不可以益河海撮土之不可以加泰山也公子之艸特令執經余門公旣彌留而之聊會試在京師遺言必乞余一言定公生平之行狀嗚呼余爲荒廢頽落之人公獨略去勢分而有所取焉豈非以其質直而不冒阿所好乎公疽發於頸血氣漸耗屢下不止疾旣亟尙索紙作買棺寫真二詩比至屬續神明不

亂蓋其養有素也公生於康熙壬戌二月二十六日終於乾隆乙丑二月二十九日春秋六十有四 敕授文林郎再授儒林郎例授奉直大夫公之階也娶於陳 封安人例晉宜人男子子三長卽之紳乾隆辛酉舉人次之莊次之開繼弟明彥爲後女子子一適太學生傅庭芝明彥遺一女公撫之如己出亦嫁士族太歲在丙寅子月晦之紳將葬公於桃源嶺青芝塢之原幽宮之銘伐石有待匍匐稽顙件繫行事勾余筆授以竟先人之志是不可辭也謹狀


右行狀杭世駿撰

先生幼孤貧眇一目自嘲云自號小冠杜子夏人嗤一目湘東王

右隨園詩話張維屏錄

筠谷以詩爲事業有指其失及改定其詩者終身敬禮之出使廣南時山人黃子雲適畱其地爲點竄數言出橐中金贈之俾還故鄉此風近日已罕見矣

右 國朝詩別裁集小傳沈德潛撰



黃之雋

黃之雋江蘇華亭人原籍安徽休甯少聰穎讀書過目輒成誦康熙六十年進士改翰林院庶吉士雍正元年奏中元祭 聖祖仁皇帝文稱 旨越日 召見授編修充日講起居注官尋 命提督福建學政一歲之內疊荷 特恩蓋異數也二年遷中允三年以巡撫毛文銓奏參庇護生員 命回京四年降編修五年復以浮開廩冊革職乾隆元年刑部尚書徐本薦試博學鴻詞是時之雋年逾七十試日屬彙成以目眊不能就燭下作書遂納卷出報罷南歸又十餘年卒之雋倜儻自喜初罷官歸囊無餘貲惟嗜蓄書著目者二萬餘卷撰述甚富詩筆尤工手編唐堂集六十卷別

開生面仍復不失正軌嘗集句爲香屑集十八卷凡古今體九百三十餘首千首中句無重出一首中人無疊見又集唐人文句爲之序亦二千六百餘言組織工巧一一如自己出雖非正格實爲唐宋以來所未聞兼收並蓄足見文章之變無所不有也

右 國史館本傳

雲間詩自陳黃門振興後俱能不大歧途累累繩貫至盧文子後又日就衰隕眇所宗法矣唐堂學殖富有而心思才力又足以驅策之故能自開生面仍復不失正軌謂之詩學中興可也

右 國朝詩別裁集小傳沈德潛撰

按黃公字石牧

邵秦

余與編修邵公北崖交四十餘年矣自雍正癸卯余以後進謁公未相知也公籍大興僑居吳余官江南驛鹽道時制府尹公延公主修江南省志因時過從見公色夷氣清退然自下與之語愈叩而愈無窮始知公好古純篤之士也嗣余歷宦四方每過吳必相見劇談移晷交相勉於實學余撫西安欲聘往主書院講席公以葬親辭丁丑余奉 命撫蘇見公顏稍衰然爲余評隲課士直解猶有精理偶一相見咸歎士習漸趨浮靡而篤學之難其人也余赴粵東往別書齋於天文理數學術事功同條共貫津津有味乎其言之相約赴粵以道遠中止及余再莅蘇正擬延入官齋講明

切究造就多士乃僅一把袂而公病已漸劇余急欲趨晤公遣人止之不數日而遂以訃告矣憶自相識以及於今每一晤談非關道義文章卽關人才風俗歷歷在胸臆間有不能已於言者故於其孤錦鸞之請銘而綴以辭焉按狀公諱泰字峙東號北崖系出河南曾祖以上譜亡失考曾祖諱某始遷崇明祖諱某再遷大興以公貴 贈文林郎翰林院編修考諱希賢以長子官 贈中憲大夫大理寺少卿復以公貴 贈如其官祖妣王氏 贈恭人繼妣陸氏 封恭人中憲五子曰觀大理寺少卿曰謙 贈兵科給事中王恭人出曰臨甲午舉人候補知縣次卽公曰豫刑部見審司主事陸恭人出公少孤體羸專靜好學工制舉業年十九補順天

府弟子員辛卯舉於順天壬辰下第以學未至兩科不赴會試肆力於古辛丑成進士授翰林院庶吉士癸卯充會試外簾官散館列一等授編修丙午典試四川號得人丁未假歸乾隆戊寅十一月十七日以疾卒於家年六十有九公自成進士立朝僅六載以母陸太恭人在南迎養不至遂決歸志時母雖年逾七十甚康強同母兄弟三人非獨子公願不以自解歸養二十年同榜士躋卿貳秉節鉞落落布中外公一不爲意唯色養是樂一味之甘必愉色手奉母曾邁危疾公曉夜叩天乞以身代卒得無恙母後患風痺五載公扶侍未嘗刻離母喪後遂不出公口不談理學而於聖賢經傳寢饋研玩易詩皆纂說旁及老莊列管荀揚呂氏春秋董

子繁露諸書手自摘錄謂諸子精處亦見道之一偏於修身治體
各有助於聖人之教貴善讀耳嘗與余言易隨事物皆足見易未
嘗不歎公學之深也於民生休戚利弊當世之務無不洞其曲折
制府尹公素器公時有所咨訪必舉地方切務於余亦然使公進
用出所負豈類經士齷齪不曉事者必有所建樹無疑也公學充
於中而常若不足所為古文詩歌不以問世橐藏於家能作擘窠
大字吳中扁額碑刻多出公手伯兄仲兄季弟皆先公卒惟三兄
與公同白首友愛若童州公別築書圃以居即以舊宅內公分讓
兄平居節嗇以恤族嫻之貧乏者人多懷之娶王氏封孺人先
公卒有淑行公每念其力疾事姑以致不起久而悲之子一錦鸞

順天府學弟子員醇謹能讀父書女四一適吳仁太學生一適宋
巨源乙丑進士大庾縣知縣一字蔣炳未婚守貞一未字殤以某
年某月某日葬公於某鄉余惟公篤於倫理淡於榮進沈浸於學
而不以講學鳴此真篤於學者是可以銘銘曰
眾營營以趨獨黯黯以居既早達而勇退愛春暉之長舒斂菁華
之灼爍力六藝之藹裔雖勳績未樹蔚然經師與士模任化而往
斯人殂銘茲幽室儼非諛

右墓誌銘陳宏謀撰

國朝文獻卷之二十一



蔣恭棐

同年友蔣君諱恭棐字維御一字迪甫其先廣陵人後徙蘇州五世祖育馨以舉人知清流縣高祖燦由進士官至天津兵備道曾祖圻以子鎰貴 贈奉政大夫祖鉢 馳贈考溶 封並如君官君生四歲即通四聲讀書過目不忘十歲為文章有奇氣十四補博士弟子員時華亭張文敏亦以五經受知學使者江左文士矜奇耀異人握靈蛇之珠而張蔣兩君獨守先正矩矱所為文流傳都下安溪李文貞見而歎曰是今日之思泉震川也後文敏數年成進士君 廷試違式落第夷然歸里益肆力於古又七年與余同成進士入翰林充 玉牒館纂修官一時制誥典冊出君手輒

國朝文獻卷之二十一 詞臣十一

為院長所激賞以封公七旬假歸上壽里居七年極色養之樂
今上即位之初昭回之光下飾萬物天下文士爭自濯磨與時而
奮封公以精力尚強命君北上供職充大清會典 五朝國史館
纂修官居無何以原官休致適封公以哭長子過慟朝夕奉侍未
嘗須臾離膝下先後居二親喪哀毀骨立時余與張文敏同事西
曹公餘屈指當代古文必推迪甫每欲邀余公裁薦剡既而文敏
以疾去不果辛未二月 法駕幸吳中侍直宮門蒙 溫旨垂問
賜內府緞匹余時忝扈從見君於豹尾班後則鬢鬢皓然矣癸
酉冬德州盧君抱經再擢兩淮都運延君主安定書院諸生慕君
名擔簦而來者咸虛往實歸君自誦曰吾雖老願以平生所得公

之諸生當不負盧君也余適訪盧君於邗上盧君招余兩人飲花
下賦詩以紀斯會數日余辭歸長水未浹月而光嶽等已扶櫬歸
吳門矣盧君經紀其喪人皆以君篤於友誼卒得友朋之助云君
湛深經學詩文無專師於唐宗少陵義山於宋愛廬陵臨川藏書
數千卷皆手評數過著述十數種光嶽等方編輯授梓君生於康
熙庚午十月二十三日卒於乾隆甲戌六月初四日年六十有五
娶宋氏先君卒男七存者光嶽道恢師郊皆能世其業女五孫男
三孫女五以乾隆二十年十月某日合葬於長洲縣二都十五圖
福字圩銘曰

余少賤走 皇都儔眾中揖二廚評道藝說唐虞雲閒張吳趨蔣

一扶搖雲霄上一守官師儒長尙書星隕峒崕郵詞客又訣邗水
溝低徂往事五十秋感舊一哭霜滿頭魂歸來兮樂斯邱

右墓誌銘錢陳羣撰

儲大文

大文全集十六卷而論形勢者居七卷 國朝百有餘年惟閻若
璩明於沿革大文詳於險易顧祖禹方輿紀要考證史文雖極博
洽往往以兩軍趨戰中途相遇之地卽指爲兵家所必爭不及二
人之精覈也

右 四庫提要張維屏錄

儲大文字六雅江南宜興人康熙辛丑舉會試第一官庶吉士精
輿地形勢之學著有研樓集言方輿要隘者居多同人弟子也

右事略李元度撰

兄弟同科登進士者屢見於漁洋菴塘之紀載指不勝屈矣莫盛

於宜興儲氏康熙辛丑會元儲大文其弟郁文雄文與之同榜越
五年方慶善慶又以同胞兄弟同捷南宮洵稱佳話

右紀聞陳康祺撰



吳啟昆

江甯吳先生諱啟昆字宥涵進士官編修著索易臆說二卷總論
易之大旨不復章解句釋如上下經之分篇諸卦之命名以及先
天後天圓圖方圖等類各爲一篇以闡其義其卦變一篇爲彖傳
所云剛來柔進之類必本卦貞悔二體實有此象而云然非本卦
所無外卦所有而必假之以得解也在本義逐爻細推以爲此自
某卦而來不過兼此一說欲使經無廢義非真先有彼卦而後方
有此卦也後人專信本義遂誤以餘意爲正意又如分宮卦象次
序一篇謂天地之造行不離五行八卦率領諸卦分掌五行以用
事術家以子父才官兄弟論生剋制化而不知其所以然然剛柔

者立本者也綱領之八卦是也變通者趨時者也所屬之諸卦是也一切往來屈伸之理無一不在此六十四卦變通之中其發明象數皆爲有見

右學案唐鑑輯

按吳公康熙辛丑進士

陸奎勳

陸奎勳浙江平湖人父世楷南雄知府奎勳學殖早富隨叔父棻於京師公卿爭相引重歸倡洛如詩社風雅振興久困名場受遺命終不他途干進年幾周甲始成康熙六十年進士改翰林院庶吉士雍正元年授檢討充明史纂修官撰擬制詔多稱旨尋以疾乞休主廣西秀峰書院勅立學規倣朱子白鹿洞遺意成就甚眾平生淡榮利不爲嶄岸峻絕之行而秉持不貳薄田未足供饘粥無戚戚容惟一意說經初於醫卜術數韜鈴步算以及仙佛諸書靡弗旁鶩務極泛濫卒歸平實當其覃思冥索卽暑月漏常三下飛蟲交階若不知然有所論述聽者忘倦自謂六經注我而

後可以我注六經兼合六經以注一經著有陸堂易學十卷宗朱子者十之六宗諸儒者十之四閒亦釋以己意得力在說卦一篇足該全易而以坤以藏之章爲歸藏象帝出乎震章爲連山象又言商之歸藏本於神農夏之連山本於黃帝人知畫卦重卦皆由伏羲不知黃帝始立蓍數及乾坤八卦之名屯蒙諸卦名則堯舜始增序卦之錯綜乃文王始定詩學十二卷不取正變之說不特楚茨十詩斷爲成康盛世之音凡斯干無羊考室考牧均歸正雅楚邱緇衣蟋蟀均歸正風譏鄭氏詩譜時代舛謬不倫歐公強爲釐正猶多牽合周召二南以地不以人王風乃時爲之非有意於貶平王如此類有辨正精覈者大致與明何楷詩世本古義相近

且以爲不宗孔孟之傳第守毛鄭之學極詩之用不過三百而止是以有魯詩補亡之作今文尙書說三卷病蔡沈集傳於禹貢黑水三危之屬生長南疆末由考訂洪範中以五事配五行專主相生不兼相剋未免後人滋議故參其疑闕所解惟伏生二十八篇而古文則置之蓋用元吳澄書纂言例也戴禮緒言四卷糾正漢人穿鑿附會其閒指曲禮之漢儀識樂書之補闕摘燕義之非古下至檀弓榆沈少儀几穎悉爲矯其謬而析其精春秋義存錄十二卷凡經傳子緯所載孔子之言盡援爲義力主春秋非以一字褒貶能掃公穀拘例之失與宋儒深刻之論其疑胡傳而信左氏亦足破以經解經之空談特奎勳經學自信太勇務出新奇是其

國朝詩集卷之二十一
所短最後撰古樂發微已屬彙疾劇未成而卒又嘗輯八代詩揆
唐詩安字音舉要等書詩文自弱冠時已充篋笥後乃以餘事爲
之文博辨詩獨風流明麗文集二十卷詩正集十六卷續集八卷

右 國史館本傳

陸奎勳字聚侯一字坡星平湖人南雄太守孝山公之子而內閣
學士雅坪公之猶子也年十二卽能詩未弱冠以文字雄吳越開
幼作中秋月夜書懷詩鏗訇陶冶情文並茂嘉善匡山叔父見而
奇之贈句云鵝水才華盛吾家太守賢生兒年十二詞賦自翩翩
卽集中開首第一章所云碧天如練夜初涼者是也顧少年善病
雖性喜吟詠而父師專督時藝禁勿使爲弱歲列子衿旋遭生母

憂謝絕人事兀坐小樓中課孤姪暇則取插架書讀之手胝口沫
如是者三年胸中積有卷軸而於漢魏六朝唐宋諸詩家亦各悉
其源流正變不迷所往而詩學大昌久之游京師與楊次也副使
沈厚餘榜眼柯南陔進士唱和城南有浙西四子之目時康熙庚
午辛未閒詩人競趨宋派而吳園一帶宗仰虞山幾如團扇之畫
放翁先生少長是邦顧不能不隨俗轉移而細膩風光森張骨氣
固自有其君形者存非彼學步效顰輩所可同日語也嘗選定十
二唐人安詩集行世各系以詩其題杜少陵云文選理熟精宋元
格具有五霸紹三王罪魁而功首石破天驚其論實古人所未發
誠足開拓心胸而推倒智勇也已先生雖門第清華甲於江左而

自其尊人沒後家計中落授經餬口時爲萬里之游則益研精經學寓淮揚者三載於諸經皆有撰著解匡鼎之頤而折五鹿充宗之角譬蜂釀蜜如肉貫弗宋元人經解如林自貢父華谷草廬東山一二家外度未有與之並駕而齊驅者而大江南北尋章摘句之徒猶泛泛然以詩人相推重蓋亦淺之乎爲丈夫矣庚子辛丑年六十始聯捷成進士入史館纂修明史計足踰省闈已一十三次矣先公爲閣學公所得士庚午之役先生實在鎖闥襄厥事贈編班荆與先公講世好甚篤柳州先友之痛能無有感於斯文

右小傳鄭方坤撰

平湖陸先生諱奎勳字坡星撰戴記緒言四卷大旨以禮記多出漢儒不免有附會古義之處而鄭康成以下諸家又往往牽合穿鑿以就其說乃參考諸經旁採眾說以正之每篇各以小序爲綱而逐字逐句條辨於後用力可謂勇矣又著陸堂易學十卷宗朱子者十之六宗諸儒者十之四閒以己意訓釋於前人亦無大異同惟謂伏羲但畫八卦而無卦名黃帝乃以名乾坤震巽坎離艮兌堯舜始增加屯蒙諸卦名等說未免新異又著陸堂詩書學十二卷又春秋義存十二卷

右學案唐鑑輯

奎勳少好談兵又精六壬學及星家言繼而學仙學佛年四十一乃一意經學著有陸堂易學詩學今文尙書說春秋義存錄戴禮

緒言

右兩浙輶軒錄張維屏錄

陸堂穿穴五經皆有述作今人中井大春也詩獨風流明麗廣平賦梅花不礙心似鐵洵然

右 國朝詩別裁集小傳沈德潛撰

夏力恕

先生姓夏氏名力恕字觀川孝感人生三歲能以意推字偏旁得其音義稍長於書無所不讀尤長於詩酒閒席次引杯刻燭爲之愈捷愈工然殊不屑意弱冠讀宋五子書窮日夜不倦灑然遂有所得康熙庚子以第一人舉於鄉明年成進士與其兄力忠同選庶常時號二夏旋以館課詩受知於掌院徐公未散館薦授編修雍正癸卯順天鄉試同考官甲辰出西正考官加日講官起居注忽心動曰母念我也卽日告歸逾年轉病假制撫強起修湖廣通志母卒侍父鈍最公於蘄水學署請終養許之先生自通籍以來至於屬纊屏跡林下垂三十年未嘗一日廢學先生之學務在窮

理隨事體念以求自得而未嘗有所標目故其爲教也平易和樂不立異同眾人易從而賢智者終身由之無復流弊主江漢書院負篋至者歲數百人循循皆由禮法或問爲學之指第教之立志而歸於因文以見道蓋是時場屋之文務爲浮靡人皆揣摩習熟不復嚮學先生以爲制藝正則人心正而學術有所從出自爲課藝輯題解引伸推廣而究極其本學者於是翕然皆知返而求之六經二三年間楚中風氣爲之一變先生曰可以休矣辭歸益引疾不出著四書劄記二十卷證疑備覽八卷杜詩筆記十二卷菜根精舍詩十卷古文四卷易論二卷四書文已行世者更定改本藏於家先生聞道最早沈潛義理久而彌篤劄記一書剖析微言貫穿洞達自謂生平精力盡積於此已脫橐猶手寫至再往復訂正意趣油然乾隆丙辰舉鴻博丁卯舉經學皆固辭居母憂哀毀骨立鈍最公年益高事之益謹飲膳非親嘗不進族人貧者賴以舉火無慮數十家晚年名所居村爲上農布袍竹杖往來閭里望若神仙或與田父野老煮茗道故欣然忘倦因自比於農學者遂稱澗農先生云鈍最公年九十二無疾而終先生六十五卒亦無疾晨起整衣端坐書得其意義沛乎蒼旻數字輟筆遂逝蓋先生之學深造自得悉由心悟其爲文章縱橫出沒神明變化於古人之法而主於得其意義之所歸故自言如此力忠字映川先生少師事之見菜根精舍家傳

右傳程大中撰

程大中，字伯玉，號石湖，嘉興人。康熙辛丑進士，官翰林院庶吉士。含奇館選未幾旋卒。無有知其能詩者。讀其遺集，鬱伊易感，愴快難懷。情至文生，咀吟不厭。何吾吳之多詩人也。彼山澤之士，沈淪而不章者，可勝歎哉。

李鍼

李鍼，字含奇，直隸盧龍籍，江南吳縣人。康熙辛丑進士，官翰林院庶吉士。含奇館選未幾旋卒。無有知其能詩者。讀其遺集，鬱伊易感，愴快難懷。情至文生，咀吟不厭。何吾吳之多詩人也。彼山澤之士，沈淪而不章者，可勝歎哉。

右 國朝詩別裁集小傳沈德潛撰

士將命而不...
 戴瀚...
 楊炳...
 上以...

于振 戴瀚 楊炳

雍正癸卯狀元金壇于振榜眼上元戴瀚探花鍾祥楊炳 上以
 登極首科 恩施格外俱著在南書房行走曠典也

右記余金撰



沈淑

漢唐宋以來諸儒有以羽翼經傳為功者有以潤色鴻業為功者
議者謂潤色鴻業之功顯羽翼經傳之功隱不知稱頌功德發揚
盛美文章爾雅之士類能之若夫稽考古今網羅放失必宏通淵
博之才乃克為之其流風餘韻所以霑溉後學者甚鉅常熟沈頤
齋先生官翰林為文學侍從之臣潤色鴻業固其職也而其功乃
在羽翼經傳嗚呼豈不偉哉先生諱淑字季和一字立夫曾大父
諱文瀾大父諱萬堉父贈公諱錫蕃先生天才卓犖精敏絕倫自
少即不屑為俗學憫文士溺於見聞務為雷同苟且獵取科第慨
然以古為師徧讀十三經注疏及宋元經解為文獨標精理刊落

沈淑

然以古為師徧讀十三經注疏及宋元經解為文獨標精理刊落

浮華晚聞先生謂王錢遇之亦當卻步真足紹安溪之傳而無愧者雍正元年成進士入詞館以峭直少合方望溪先生語以窮經治古文乃能異於俗儒遂乞歸養母杜門卻掃日以著書自娛嘗論世嫡承重之異太宗小宗之辨支庶爲後之禮斥張羅峯繼統繼嗣之說之謬其言如懸河倒峽沛然莫禦諸公咸爲之傾倒所學尤長於毛詩周禮儀禮病王安石附會經傳新法困民幾令儒者疑周官非致太平之書乃於注疏外廣採諸子百家之說足以輔正義破邪說通矛盾辨誣罔者撰周官翼疏六十卷先是臥病京邸時輯陸氏經典異文春秋三傳異同分國地名職官器物宮室及注疏瑣語名曰經玩都爲二十卷書成未獲行世閱四十五

年長君斌官河東運使時始以其書進呈列於金匱石室之藏蓋著書之難難於擇所向所尚是矣或不能成於一手成矣而顯晦又自有時故非有堅固不拔之操者往往憚而不爲今上御極之十有六年詔天下舉通經之士同邑陳見復先生祖范褒然爲舉首而先生歿已二十餘年矣厥後顧主事古湫先生著虞東學詩孫主事莊九著周易讀易揆方是皆聞先生之風而興起者吾虞自國朝以來偉人傑士代不乏人而能昌明經義著有成書者始自先生後之人猶知尋求根柢不至於荒經蔑古者亦自先生方先生少時詩文與宋君樂齊名時人目爲沈宋不幸俱早世願一則僅以詞章著一則敦崇實學名山之業足以傳世嗚呼先

生爲不朽矣先生生於康熙戊寅歿於雍正庚戌春秋三十有三夫人蔣氏以子官封淑人長子栻河東鹽運使次子縉國學生孫廷焯廷瑛俗又傳先生前生爲之峯僧碩揆此乃彼教中夸誕其詞冀以惑世其質殊不足爲先生增重云乾隆四十二年正月二十九日始葬先生於慶安之兆熊與栻爲同年友謹述所聞以表其墓而繫之以辭曰

嗚呼先生儒宗是程弱冠通經博稽六藝補罅抉翳不阿於世禮堂寫定羣書紛競於焉考訂獻之巖廊祕閣以藏斯文允昌

右墓表邵齊熊撰

張江

張江字百川別字曉樓江西南城人其族望頗蕃昌世居邑之郭下邑人稱郭下張家前明成化己丑殿試一甲一名張昇歷官至禮部尙書謚文僖乃江先世第不知文僖於江實爲何世祖也江少卽敏於時文一題輒拈數藝如翻水涌雲能各盡其變態每下筆不自休卽老宿亦稱吾畏之長與同邑羅癘枚潘安禮何天爵數子相友善磨切數子俱工時文獨江益變而沈涵今古有自得於中人莫窺其所以然者故江文遂擅天下天下經生家無不知讀張百川時文者以雍正癸卯成進士入史館是時金壇王太史步青方主持壇坫與江同年同館王旣重江之人與其文江亦相

視莫逆遂盡出其篋中文委王別擇無何江以丙午病死京邸又六年王乃序江平生所得於時文之故粹百篇行世於其為文之甘苦疾徐凡經幾變者既標目甚悉而江才力包羅秀魄崛起於同時諸名作之外又早歲即心契安溪李文貞諸緒論旁搜幽討堅定不疑因得藉窺六經之奧旨以求合孔曾思孟之微言故其文之神明變化莫可端倪要粹然一出於正於五家有其精微瘦勁無其連犴俶詭其後又十數年桂林陳文恭公宏謀撫江右復得江未刻稟五十餘篇以書趣王太史續刻之是時王年七十有八又合訂江文得百五十篇有奇續序所謂炳炳麟麟飢觀益暢者王之神契於江也微已文恭之貴仕與王之髦勤俱倦倦焉惟

懼失其殘篇贖字而不獲公之海內也江文則既信於今時傳於後世矣然江初客死京邸賴其鄉同官賻匿南歸歸則蒼黃殯本邑瀕河之萬歲寺寺故多奇殯以百十計而江子立夫初不知旌題其匿其後嗣惘惘莫辨識久之邑人有詰問立夫者則云已葬岳口其實訪之岳口又並無江墓及今尚疑不能明也立夫籍南城縣學弟子員前後提學江西者多以江故賓禮其子而立夫惰窳不類坐耗蕩無所歸立夫亦有子長既早天其次繩武又薙髮為某寺僧已而繩武日長大其師慕波謂江名公不可無後乃資而遣還張氏邑人高慕波之義亦謀醵錢合助為繩武立家室而繩武又不振一日竟遙遙遠去莫知所之江工書法喜鼓琴他皆

無所嗜獨嗜治時文有天得於博籥或偶一爲之則其時文更神
勇孤詣蓋勤一世出死力以盡用於斯文雖駁雜時之血路心城
無非顓壹時之血路心城也立夫貧不自存以江所讀毛詩尚書
周易春秋四經舊本及筆筒一破琴一質錢於同邑太學生王氏
王氏重江所遺畱許之乾隆己酉王氏有子聘珍以選拔赴京
廷試明年秋同子儻舟南歸因爲予備述其詳又言筆筒週遭書
前後赤壁賦皆江小楷手蹟至今宛然其評點四經多在章法句
法字法而於經義則略不及亦其平生結習則然乎予因謂聘珍
南城有文如江者豈可無片土封墓子曷卽以四經舊本及筆筒
破琴爲江招魂起冢使後來過訪南城者有所瞻望興起聘珍則
敬復曰諾抑予又聞江之同族銘領己卯鄉薦出今大興翁閣學
方綱之門歷官至松秦兵備道俸入最豐而於江後略無省錄頓
置翁提學江西時每言及江輒太息惋憾不已者甚矣江之窮於
死而予傳之所以不可不勑作也

論曰或言造物忌名然自制藝旣興以來其有文隄於其生而卒
不隄於其死且大顯於其死者死則造物無所用其忌耳而獨江
之旣死則犯忌轉酷矣昔南昌杜果見奇文沈埋不曜必標揭品
評惟恐堙滅其論至比於拾遺骨收棄兒江文旣曜於當時可傳
於後世幸不至零落無所收拾而乃尸解若委蛻嗣續化塗人何
與杜氏所論若適相準折然豈全乎此之精者爲存其神卽不必

保乎彼之粗者爲僅遺其跡耶抑羣奉以此之虛名所得於人世者猶少而偏降以彼之實禍其受罰於帝者更多耶

右傳余廷燦撰



王步青

歲辛未正月十有四日金壇王罕皆先生卒於家四方聞之承學之士悼喪石師氣類之交痛剝碩果靡不屏營而心不庭葬有日孤士鼇毀不能屈其慈孫維甸乃昉來乞誌銘予與先生數十載臭味之投舉禮部同年同門之分雖居遠會稀心期猶比鄰也曷可以不文辭夫三不朽立言爲又次然孔子以言垂教而功遠賢於堯舜立言非卽立功乎善言德行者加於善爲說辭一等惟身有其德也德與言亦立則俱立耳言有作述孔氏述者也漢以來爲箋爲故爲注爲疏遞相述以闡其義者也而莫明備於朱子自時厥後舍朱子莫宗矣顧傳習眾而朱子之本義有得有失有明

有晦若稽田耰鋤相尋於其土如魚鱗終不免有一稗之倖畱一
苗之誤傷此亦有心斯道者之憂也罕皆先生初以制義應舉固
已志於宗經載道先民是程而所爲拔出乎等夷及晚遇遄歸無
事功可以自效退而理故業維風尚爲後學開路指迷知所嚮方
以助 國家烝髦育才之至意以應 古者仕歸而教授於鄉之義
於是其有詩文諸選之刻抑又以爲因 文見道不若直遡道源別裁
文章之僞體尤當昭揭經傳之指歸於是乎有朱子本義匯參之
訂擇焉而精語焉而詳抉經之心擘傳之脈咀華漱液與道大適
蓋非徒經生講師循誦習傳之故冊而明道解惑之要領也既歿
而其言立可以祀於瞽宗者其不在是與先生諱步青字罕皆家

近己山學者稱己山先生遠祖宋龍圖閣直學士正肅公遂代有
卓行潛德以迄於考贈公諱永年生四子先生居長幼穎異爲從
祖明經公諱錫祉所器以嗣其早亡子贈公諱洵仁明經公宿學
也齋文就正者接踵命嗣孫先甲乙之覆按輒當喜曰兒異時必
以文術鳴俄而聲譽日起衡文者爭物色之以光其榜先生益自
韜晦故久而後遇康熙甲午舉於鄉雍正癸卯始成進士年逾五
十矣官檢討三年假歸不復出壽八十無疾而終按行狀虔奉所
後孝隆本生篤愛諸弟睦姻親黨訂故友張江遺文士林稱義焉
表高蘇生之作於塵埋蠹蝕中士林稱仁焉希風者徧天下而交
不稍濫也家雖貧而慎於取又能與也不與戶外事而桑梓閒利

病則言於當事助興除也掌教書院一遵鹿洞遺規訓迪子孫大
要敦本務實勿苟得而僅虛聲也暮年勤學顏其齋曰無逸所曾
氏之臨履終身死而後已端木氏願息而不可得蓋同此志也嗚
呼其可敬也夫其不速朽矣夫銘曰
閒閒小言殉華絕根纖纖媚學蠅頭蝸角委棄至寶曾莫尋討有
偉一人著述等身簪筆告備質我聖真歸于其邱永勒貞珉

右墓誌銘陳祖范撰

何玉梁

公諱玉梁字韋江號樟亭錢塘人祖蘭旌明季杭州府學生績學
多隱德學者稱江澣先生考喬雲康熙丙辰進士官湖廣桂東縣
知縣有循聲公幼卽穎異五歲入家塾與兄某以記誦相角勝日
誦數千言晚課畢私以他未誦者益之稍長工韻語受業蕭山毛
西河檢討門學益進康熙己卯聖祖仁皇帝南巡駐蹕杭州公
隨父迎鑾擬撰應制詩若干首以年幼格未上檢討爲之序載
西河全集年十七補錢塘縣學生康熙甲午舉於鄉雍正癸卯成
進士改庶常時新進士始行九卿保舉例而御試詩文爲尤重
公於九列無薦援特以文章稱旨拔寘詞臣掌院雅重公凡館

閣制誥多屬公撰擬進呈 宸覽甲辰授編修充大清一統志纂
 修官丙午充順天鄉試同考官得沈瀾張受長王延年等十四人
 皆知名士丁未以母喪太君患風痺疾陳情終養歸制府彭城李
 公廉公名延掌紫陽書院講席自己酉迄丁巳凡九年公持文律
 甚嚴一字一句之疵抉摘不少如遇英俊傑出之文亟首錄以為
 程式以是爭相鏃礪門下士掇巍科成進士者先後百餘人居恆
 訓士每引安定規條務求有用之學曰讀書內而無益於身心外
 不能通達世務雖胸羅萬卷謂之書簾可也生母李太君廣東新
 會人先是康熙甲辰山寇竊發舉家驚竄太君年十歲陷於賊貝
 勒某公勦平之凡寇所掠子女航海以北抵京師沁水縣縣丞裘
 某公嫡母父也倡義贖難民百口得太君詢其父兄姓名里居悉
 數不忘異之撫為女遂媵裘太君同歸桂東公生公太君居杭時
 時思父母不寘常為公道王覺經尋親故事蹙然而歎曰予雖隨
 汝父在桂東時一見吾父而今又若干年矣汝異日能至粵一訪
 里居乎言已嗚咽不自勝公恐傷太君意附舟入粵比至太君父
 已歿舅氏徙居香山造門謁見具述太君遣行意相持而泣留一
 年歸益順承母志終身如一日云甲子夏徽嚴衢三郡起蛟大水
 溺人壞廬墓棺樁浮江而下公備夫駕舟自富春江至龕赭之間
 出沒巨浪撈浮棺五十餘慕義者接踵而起閱三晝夜又得二百
 餘具於是編號繪圖沿途黏示俾子姓認歸其不可識者逾年瘞


之已已蕭山令聘修邑志公校閱舊本多改竄前史而飾爲美詞其未見正史者官階年號亦僞造居多公細加校訂如前明何孝子競父醒庵侍御以湘湖水利故爲邑令鄒魯所殺孝子報讐事具明史舊志削去父子二人傳以他有勢力者當之公憤曰父以地方公事死子爲報讐死煌煌國史尙不能沒而獨不見容於邑志公道何在於是摭尋孝子逸事其一時同事例應並載者得書十餘種爲孝子立傳是夜陰風寒慄鐙燄青熒室中若有鬼神者人以爲異何氏自上虞縣遷杭三百餘年支族繁衍桂東公會輯家譜閱年久未有續修公依派編圖增立傳記較他姓譜體例爲詳公讀書於諸經中尤邃於周易三禮嘗論易曰易聖人之書也

所以明斯道之變易無不在也王弼閒以老莊虛無之說參之誤矣顧言理學者宗程子言數學者宗邵子朱子作本義啟蒙乃兼二說窮極古始謂易本爲卜筮而作謂邵氏先天圖得作易之原謂程子言理甚備於象數猶有闕學之未至於此者遂亦翕然嚮往之揣摩圖象日演日高以先天爲先以後天爲次而易經反似承其流矣然程邵二子生同時居同洛相與二十年天下事無不言程子獨不與言易之數邵子每欲以數學傳程子而程子終不欲邵子既沒數學無傳今所存之空圖殆不能調絃者之琴譜朱子雖爲之訓釋他日有荅王子合書亦自有康節說伏羲八卦近於穿鑿附會之說則學者亦當兩酌而審所當務矣其論三禮曰

三禮之學其所以譌異者其端有四有出於前人之所行而後人更之者有出於聖門而傳之各異者有後世諸儒損益前代自爲一朝之典者有專門之學各自名家而以臆見爲先代之訓者察乎此四者而諸家之聚訟可以析其獄矣又曰歸熙甫作孝經敘錄謂其所去者是矣而所存者又未必純乎孔氏之舊也則莫若俱存之自秦火之後諸儒區區掇拾灰燼而文藝之全者尠矣非孔子復生莫之能復也今世所存如孝經家語大小戴之記要以爲有聖人之微言故莫若俱存之而待學者之自擇耳歸氏之論洵爲讀書不易之良法嗚呼誦公之言可以知公之學識矣所著有韶齔吟四卷賢鑒堂詩存一卷應制格詩一卷南齋記聞四卷史論十二卷柳浦集四卷藏於家沒年六十九子四陳調乾隆丁巳進士河南鞏縣知縣維熊雍正乙卯舉人湖廣祁陽縣知縣陳鯉乾隆辛酉舉人陳燾仁和縣學生孫四人

右傳汪沆撰





陳浩

先生諱浩字紫瀾號未齋又號生香年十七入昌平州學屢受知
學使者吳文恪公尤極賞之是時僦居大興采育家徒壁立館於
某氏書舍爽塏而自念二親居湫隘暑氣歊蒸每晡後輒入館旁
矮屋坐爲人鈔書日得數十錢養親見者異之偶有友人欲飲以
酒屬入茶肆相待旁坐者一人熟視先生曰功名君所固有異日
於學必有所成卽執先生手曰孝哉惜二親不及見君貴也先生
慨然而歸後果連遭大故雍正元年癸卯舉於鄉甲辰成進士選
庶吉士散館授職編修歷左春坊左中允改右遷翰林院侍講晉
學士充日講官起居注詹事府少詹事晉詹事 誥授通奉大夫

會入武英殿校書充一統志纂脩官武英殿提調官續文獻通考纂脩官武英殿總裁凡校經史皆參互羣籍默悟於心於疑似紛糾處爲分肌擘理同事齊次風杭大宗皆服其精博己酉典試福建閩人稱得士癸酉視學湖北視諸生之去取如自爲諸生時論文就其所長與朋友開誠受虛試應山特拔楊忠愍公裔孫食廩餼試鄖陽稽入學冊向缺額者悉增於前時部議減科舉額先生力送七百餘人閱卷三十餘晝夜甚憊一時在幕中者桐城劉畊南吳中廷畊石朱葑亭皆天下之士歲得養廉三千金盡以分賜之曰此皆以敬其事吾豈敢私吾家故自湖北歸都門三年俸之所遺只給十七日之用而此後如故典衣矣晚致仕來主河南大

梁書院按日升堂督課夜分置酒延諸生列坐娓娓講論不倦或意有未盡則踵至書舍立談以畢其義貧者賜之衣食并恤其家先後十餘年聞風而至者千人選拔爲貢生者若干人登鄉會榜分部入詞館者若干人凡豫中之士有所取則其好學而能文者咸知嚮往而不至他歧曰吾師陳未齋先生也後移席宛南教士亦如之先生自受 知遇以來 先皇帝恩賜凡四 皇太后皇上恩賜凡九加二級得邀從二品 封典辛卯恭祝 皇太后八十萬壽復加一級入九老會 賜遊香山 御園畫工艾啟蒙繪圖海內以爲異數先生性和易高潔年四十二獨居不娶室無婢妾與朋友交無慢容御下無惡聲一物不忍其傷好學至老不

厭於唐宋八家文漢魏以下詩皆有所論定詩學王孟韋柳得其
清遠書法顏李徐柳四家而不習其形貌一生凡有大事皆先兆
入夢初舉於鄉知其名次成進士館選並預知之武昌江行朝起
預戒舟人載石已畏暴風折桅臨沒預言正月十七日豈非靜極
而明者耶嗚呼先生立朝三十餘年皆清華之選無庸功可見於
世而自重其身進退趾步不苟於人世榮利恬如同事者不生忌
心卒之官列二品復蒙 聖主知遇歎其學問優長可謂存順沒
甯極人生之完福而獨其從遊之士追慕曩日之教澤不能不悲
思於無窮也先生生某年月日卒某年月日年七十有八刻有生
香書屋詩文擬古帖行世先世蘇州人父某遷京師隸籍昌平州
子二長本忠字伯思己丑進士工部郎中庚子河南副考官癸卯
貴州學政丁未七月歿次本敬庚辰進士翰林院檢討戊戌二月
歿伯思來典試時靖舉第二名今去先生歿之日十有六年矣二
子又先後殂謝自維受恩獨深有再世師弟之誼大懼事蹟弗彰
故特揭其生平大凡勒之石以垂於世

右墓表郭益靖撰



張鵬翀

張鵬翀江蘇嘉定人幼多疾資性頗鈍年十七忽開悟讀經史如
宿習作文及詩下筆纏纏數千言立就補諸生試輒冠其曹雍正
五年成進士改翰林院庶吉士八年散館授編修十三年充雲南
鄉試正考官鵬翀早擅詩名才思敏贍嘗客松江府署刻寸燭賦
詩二十首於京邸作雉字落葉七律自晨至午上下平韻俱就又
工繪事尤長山水興會所至槩瀟淋漓書復蒼潤勁秀時稱三絕
乾隆二年大考二等試日未亭午已納卷其受 上特知始此六
年擢侍講充河南鄉試正考官遷右庶子充日講起居注官七年
擢少詹事九年升詹事嘗進所作春林澹靄圖並題七言絕句六

首 上依韻賜和繼進日長山靜畫扇 賜詩六章復 命和太

液池泛舟詠雪示詞臣張鵬翀韻澄海樓禁體詩屢 詔御前作

畫 御題秋夜讀書圖秋湖夜泛圖俱用恭進詩韻又 賜御畫

枇杷折枝圖松竹雙清圖最後 賜御書雙清閣額皆有詩恭紀

其他經進及諸臣同和者尚數百篇前後 賞賚無算十年以省

墓乞假 御製五律一章 賜白金百兩寵其行道抵臨清以疾

卒遺疏入 上為惋惜十一年 召內閣學士沈德潛對便殿論

詩 上曰爾詩以風格勝然不如張鵬翀敏捷咨嗟久之其身後

猶仰邀 天眷如此鵬翀修髯鶴立人比之東方朔蘇軾自署南

華山人所著有進呈集賡韻集宣傳集雙清閣集南華詩鈔南華

文鈔

右 國史館本傳

張鵬翀字天飛嘉定人雍正五年進士授庶吉士改檢討充皇清

文穎館纂修十三年充雲南副主考乾隆元年冬充八旗志書館

纂修六年升翰林院侍講七月充河南正主考九月升右庶子十

月充日講起居注官七年擢少詹事九年晉詹事鵬翀宿慧詩才

敏捷叉手擊鉢頃刻即成每有 敕和先成以進者必鵬翀故

上愛其才不次拔擢侍講日進經史法戒詩五十章寓規於頌

上嘉納焉又陳十愼箴稱 旨兼工於畫嘗自繪春林澹靄圖題

絕句六首進呈 上和其韻以賜鵬翀即於宮門前疊韻謝 恩

嗣後屢 敕和詩屢 命作畫 賜御詩書畫暨筆硯紗緞絨貂
之類無算每 召見溫語移時諮訊纖悉十年乞假省墓抵德州
病卒 上久而不忘對羣臣輒曰張鵬翀可惜云性好山水所至
必以五七字寫之故詩編最富有南華山房集三十卷

右傳王昶撰

張鵬翀字天屏嘉定人其所作詩畫自署南華山人天下識與不
識皆稱張南華云南華幼多病年十三始就外傳旦所授書暮或
未能成誦父師以常兒畜之不之責也十七歲心地忽開豁取經
史子集讀之皆如宿習作制義及有韻語走筆立就纏纏數千言
又嘗出己意捋迴文賦八首芋眠清麗無一字不工穩弱冠補諸

生壯歲掇科第去授史職有聲館閣閒既受 今天子特達之知
不數載晉宮詹乃以展墓假歸道病死訃聞都人士皆惋惜以負
才而未竟其用也南華本擅詩名而才情敏贍尤爲海內少雙嘗
容松江郡齋寸燭賦詩二十首又於京邸作雁字落葉七律自晨
至午上下平韻俱就抽祕騁妍長安爲之紙貴閒以餘力作山水
興會所至礮礮淋漓出入南宮北苑閒書法亦蒼潤勁秀時稱張
翰林三絕 上固雅重其才有作則使步韻又屢 敕御前作畫
其所進春林澹靄圖及日長山靜畫扇皆稱 旨依韻 賜和並
製詩褒美之有螭頭奏對春風靄寫出春林亦絕勝又大癡更
擅東坡筆勅敵江山兩不慚之句夫大弦春溫者君也小弦廉折

國朝書牘類傳卷之五 卷百二十五 四
以清者臣也宮商相應玉節金和讀金蓮紀恩一集覺卷阿遂歌
虞廷賡載其氣象猶宛乎可接上下志同得不歎爲千古之榮遇
也哉憶予曩歲入都南華特枉顧講寺中尊酒論文過從無虛日
義馭不留尺波電謝披覽遺集蓋不勝山陽聞笛之感云

右小傳鄭方坤撰

乾隆十年春詹事南華張先生以久未歸里省墓乞假 天子允
所請 賜白金百兩 御製五言律詩一章以寵其行同朝榮之
舟行過德州遇病抵臨清卒遺疏上 天子惋惜以負才而未竟
其用也冬十月諸孤汝霖等以行述來乞狀潛於先生爲同學爲
後進且以詩作合其何庸辭先生諱鵬腫字天屏一字抑齋號南

華先世崇明縣人後徙居嘉定安亭里遂占籍焉先生性穎異初
就傅讀書如宿習十歲博覽經史諸子作制義及有韻語走筆立
就纒纒數千言同族樸邨匠門兩先生驚異之弱冠補諸生旋食
餼試每出曹偶上大江南北人士爭欲識先生癸卯中南闈試丁
未成進士入詞館庚戌授職乙卯充文穎館纂修官主雲南試
今上御極覃恩加一級 詔封乙代丙辰充八旗志書館纂修官
丁巳 御試乾清宮取高等冬書館告成加一級辛酉晉侍講主
河南試晉右春坊右庶子充日講官起居注壬戌隨 駕恭謁
秦陵晉少詹事癸亥 命稽察宗學甲子晉正詹事位日高望日
重朝野以公輔期先生其試乾清宮也日未亭午諸臣方構思先

生卽投卷 上天縱多能文不加點筆不停綴詞臣中罕可廣和

者至是心賞之繼進 萬壽聖德詩百章繼進自繪春林澹靄圖

并題七言斷句六章 上依韻賜和繼進日長山靜畫扇 上賜

詩八章繼 命和望雲思雪意詩時 宣上御舟特 賜坐復

命隨輦入朝賦詠雪紀恩四章復 命和太液池泛舟詠雪示詞

臣張鵬拙韻既復 敕和澄海樓望海禁體詩後屢 敕御前作

畫後 賜御畫枇杷折枝圖松竹雙清圖最後 賜御書雙清閣

扁額皆有詩恭紀其他進詩與諸臣同和者不下數百篇不能備

述前後 隆恩賞賚亦不可勝紀潛嘗觀古君臣閒如唐元宗於

李白至手調羹以食之德宗於韋綬至以蜀襪袍覆之而令狐綯

蘇軾並徹御前金蓮燭送歸院亦云榮矣然未聞君臣倡和略分

位而通以性情者卽皋陶之賡載歌召康公之遂歌可云一德一

心矣然皆君倡臣和而臣下作歌君仍其韻者卒未之前聞今先

生備膺古人之榮矣而 天子之冲懷若谷者詩與書并莫之載

焉嗚呼遭際如此可云上下交而志同者耶先生雖以文華筆墨

受知然素性忠愛偏直所進經史劄子都關治要十慎箴經史法

戒五十章得諷諫體奉使滇南時值逆苗未靖先生所過都邑必

周覽形勢熟籌勦撫機宜復 命陳奏 上可之會經略張公已

奏捷未及行旣任宮詹例與秋審議論往復多所平反於彪文褻

藝中具經世才略使得盡展底蘊必有赫赫不可蓋者乃中道徂

謝人第目以相如子雲可惜也少歲敬事父母不敢遠離既長有以千金幣招者弗往兩遭喪毀幾滅性營葬盡禮伯兄早歿終身抱鵠原痛遇朋舊不設儀文客至具蔬酒設脫粟飯共食客辭亦不强也友有過必盡規至面赤不顧然久之共諒其偕人於善卒服其誠生平喜遊歷未遇時嘗泛沅湘涉洞庭望九疑衡陽徧覽楚中名勝因作畫辛亥請急歸嘗之采石敬亭登黃山上白嶽所到必窮其巔至猿鳥絕迹乃返故寄之詩畫者能脫尋常蹊徑寓京邸老樹瘦石空亭修竹亦有林壑閒意與客弈隔院聞丁丁落子聲客請作畫興到半日可得數幅或竟歲不得一二紙蓋取適也人因其灑落越俗又修髯鶴立或比之東方曼倩或比之東坡居士而先生自謂南華散仙具仙骨有仙氣云先生生於康熙二十七年五月二十六日卒於乾隆十年四月十四日享年五十有八配王淑人勤紡織甘粗糲先生不善治生淑人始終綜理之三人汝霖太學生候選州同知嗣伯兄後汝標龍輔俱太學生嘉定故多才人李唐程斐四先生後至今時聞接踵先生出高越輩流古文恣肆滂澗不名一家制藝獨宗正軌典滇中中州試取文獨高而華贍英敏尤在詩學晚歲亦喝韻而成古之刻燭擊鉢無以過之今刊刻者制藝有四書文彙詩有南華詩鈔共若干卷其中進呈集賡韻集傳宣集雙清閣詩皆應制作潛長先生一十五歲定交在諸生時人詞館分前後輩而燕居會合仍齒序嘗與

先生結詩社先生詩點筆就潛苦吟未安滋愧惡先生曰遲速本
之性生子不能效我速我亦不能爲子遲也今年夏蒙 恩召對
便殿語及詩學 上曰爾詩以風格勝然不如張鵬翀敏捷咨歎
久之兩人遲速在 聖人品藻中而先生之邀餘榮於身後者爲
無窮也因諸孤請節其行述作狀他日上之史館俟史官入文苑
傳中謹狀

右行狀沈德潛撰

南華在朝房和湯圓詩云甘白俱能受升沈總不驚張文敏曰不
料倉卒猶能自見身分

右兩村詩話張維屏錄

張南華宮詹侍直乾清門有 旨宣召而南華已歸 上以詩責
之云傳宣學士爲吟詩勤政臨軒未退時試問羔羊三首內可曾
此際許委蛇 命依韻和成聊當自訟南華遵 旨和進 上喜
賜以克什南華又進謝 恩詩有 溫語更欣 天一笑翻教
賜汝得便宜之句

右記余金撰

國朝耆獻類徵初編卷百二十六目錄

詞臣十二

林蒲封

柏謙

吳履泰

嚴璲

顧成天

儲晉觀

宋枏

劉元炳

張宗說

曠敏本

全祖望

夏之蓉

諸錦

周長發

任端書

梁啟心

嗣子同書

葉酉

孫景烈

蔡揚宗

劉元熙
陳夢元

楊理
劉校之

邵齊燾

姚範

鄭虎文

黃遇隆

林學易

陳長鎮

圖鎔布

吳鴻

補錄

蔣棻之

杭世駿

陳夢元

姚範



國朝耆獻類徵初編卷百二十六

通奉大夫前署江西巡撫江西布政使司布政使湘陰李桓輯

詞臣十二

林蒲封

蒲封經術湛深天文律呂醫卜諸書靡不窮究尤工書法官侍從者二十年性恥奔競退食之暇閉戶著述蕭然如寒素嘗採唐魏徵十思十漸李德裕丹宸六箴宋司馬光五規括其大意作保業惜時遠謀重微務實五箴以獻屢和 御詩稱 旨纂修 國史敏練精勤凡有舛誤侃侃正論編纂 皇清文穎校刊經史三通無不精當樂施予俸餘悉以周親族疊奉分校北闈督學江西之

命 帝眷方隆而蒲封適邁疾卒 命馳驛歸葬著有讀史錄

十四卷

右廣東通志張維屏錄

按林公字鼇洲廣東東莞人雍正八年進士官翰林院侍讀學士尚

著有鼇洲詩文集

柏謙

先生姓柏氏諱謙字蘊高先世居金陵杜柏村後遷句容高祖應科由句容遷崇明曾祖文宗任俠好義祖繼元早卒 贈文林郎祖母沈氏 贈孺人父萃邑庠生 封文林郎 贈儒林郎嘗夜行見一女為賊所掠奮挺追逐奪還其家雍正十年秋海水漂溢縛後以救溺者全活甚眾母吳氏 封孺人 晉封安人先生幼穎異五歲時邑有盜警居人爭出避先生奮曰是聞有三丈夫何畏父問三丈夫為誰對曰父伯父兒是也父大奇之比長師事同邑孝廉李杜詩能傳其業經術通明傳記該洽年十九補博士弟子員雍正元年癸卯先生年二十七時督學使者閩中鄭公任鑰

甄顯才俊雅負藻鑑先生食餼膠庠知名郡邑遂以選拔充貢成均明年甲辰中順天舉人八年庚戌成進士改翰林院庶吉士時先生祖母年九十矣謁告數月錦衣稱觴鄉人榮之十年父得劇疾醫莫能愈先生請急歸省晨夕祈禱願以身代果獲瘳快十一年散館授翰林院編修十三年乙卯爲順天同考官乾隆元年丙辰爲福建正考官三年戊午又爲福建副考官是年迎養父母於京師明年丁父憂九年起就職是冬 聖駕幸翰林院先生與陪盛典 恩賜筵宴及書幣茗果十一年五月以母逾七十陳情歸養崇明濱江海多水患明年避災至常熟縣因定居焉十六年恭遇 覃恩敕授儒林郎翰林院編修加一級十七年丁母艱服終

會足疾遂不赴職先生爲人訥於言辭敏於文翰內行敦厚飭躬戒慎雍容儒緩氣度冲雅曾祖母沙太夫人好食炒豆年八十無齒常嚼而飼之父嗜鳧雁一日從遠道獲鳧手自烹治疾行三十里攜歸進之父大喜噉之至盡弟恆八歲殤常涕泣悲思旣而懼傷母意乃止潛詣其冢哭之姑適沈氏家困乏數調之及爲收恤子孫營度婚葬具有恩紀幼受句讀於盧翁翁貧老飢寒廩給終身盧翁之師王君無後骸柩暴露復爲葬之有故人以子不肖欲致之死先生曰是尙可教因舍之家誨諭百端數月後其子悔悟卒成善士盛生者嘗與先生訟田後觸令怒懼罪他適令捕之急妻子惶怖求援先生先生擁佑甚力伺令怒解爲請得釋崇明沙

田增損無常版籍易淆舊有一圈一則之法而豪強易於兼并漸
紊其制乾隆四年先生倡紳士力言縣令復其舊又其俗田主徵
租於農往往於常數外廣立名目多所斂索獨先生田盡除之人
誦其德丁卯秋饑民四出抄掠經先生永豐沙相戒無敢犯者雍
正中舉場文體日趨豐博海內宗尚翕然同風先生上追隆萬別
啟清新篇約而味長辭輕而趣逸同時殆無其匹善楷書有唐人
風矩莊舒取之伯施剛勁參之信本融此二妙方幅擅長回翔館
閣以文雅著稱座主常熟蔣文肅公合河孫文定公休甯汪文端
公咸深加獎鑒目爲醇儒前後充奉宸苑供奉一統志館武英殿
經史館明史綱目館纂修官先生所修綱目前當筆者數更久不
具槩而程限迫促先生晨夜排纂如期訖事鬢髮爲之盡白性恬
靜不事干謁及聲氣結納自乞養歸里家居垂二十年弈棋賦詩
種果栽花文人勝流談讌彌日或時與田父野老共語稼穡脩然
自得無復榮進之意志樂山水常熟跨山爲城巖壑幽勝春秋令
序煙景清淑探選泉石登賞靡倦嘗歲除獨游虞山迨暮從容步
歸默於途中製經義一篇其襟度閒適如此所居之室常畜文魚
玩其游泳從容謂有天機流行之趣或時無魚卽置清水一器座
側曰對之令人心神澄明不爾便自鬱鬱晚年主虞山書院講席
孜孜誘導示以雅正因才上下啟發無方進退精審羣士悅服其
所獎借並有器業登科目者前後不絕乾隆二十七年崇明舉鄉

國朝詩別裁集小傳沈德潛撰
飲酒禮時論以先生耆德雅望推爲大賓縣令趙君方列狀三院
馳書敦請時先生風眩積年竟辭不就先生雖家居每正至 聖
節必具朝服瞻 闕致敬肅若咫尺及後被病人有候之者猶衣
冠出見自力迎送平生著述甚勤老而不倦有經義彙若干篇詩
文集若干卷乾隆三十年八月初六日終於家春秋六十有九配
黃氏 封安人子四廉茂並早卒渭濟並國學生女二孫二孫女
四齊齋舊忝後塵與陪研削近接塵閑亟親風旨謹按先生平生
文行皆可垂則後進爲時典型宜有碑誌誄傳以信於後敢竭蕪
淺載揚清芬麤記一二庶備採擇謹狀

右行狀邵齊齋撰

吳履泰

吳履泰字茹原福建晉江人雍正庚戌進士官翰林院侍讀學士
我師立言致行一歸誠實初謁見時敬求持己立朝之道曰端本
原無私心而已卽此訓言終身行之不盡者也

右 國朝詩別裁集小傳沈德潛撰



嚴璉

君姓嚴氏名璉字十區先世自汴徙臨安遂為仁和人曾祖大法
 祖模皆不仕考儀煌康熙壬午舉於鄉初娶邵孺人生兄在昌繼
 朱孺人生君三歲而考見背朱孺人教之學生有異稟覆九經如
 瀉瓶水羈巾為文動中程度應縣童子試為選首已而學使者責
 君賂不應輒擯不錄雍正甲辰乃用國子生名舉鄉試庚戌成進
 士改庶吉士旋患癩癰請急歸調痢里門時母夫人屆壽五十方
 以節孝致綽楔之典築壽萱堂曲盡色養歲餘疾少痊還京明年
 疾作卒於邸舍年僅三十有一蓋雍正甲寅歲五月朔也同歲生
 倪侍御國璉周修撰霽梁侍讀詩正為經紀其含殮奴子兆宗遞

國朝文獻通考卷一百二十一 詞臣十二

其棺以歸時兄在昌方攝江西萬載縣事不得行服母夫人將以歲乙卯之九月四日葬君於北山大方井之祖塋以君少嘗兄事予知君行誼爲悉因命爲誌墓之文君修門內之行居處幽室必自修整雖家人不見情容與長老言捧手負劍惟恐不下然勇於爲義告之急不以亡爲解友人吳嘉丙貧病以死不克葬君爲誌其窀穸並刊其文傳之薄遊淮陰鍵戶日課經史爲文一洗儒鈍之習孚甲新意旬鍛月鍊冥接不已至忘寢饋極意步天嘗疑雍冀齊魯之墟與鶉首大梁降婁元枵之躔次多有不合著論以發丹元子之疑又謂筆迹之妙關於人品鮮發明之者集唐史能書人爲一卷他詩文多不存惟春草碧色賦有能誦之者君生於康

熙甲申十月五日娶吳氏無子以兄在昌子震爲後銘曰

嚴維賢裔令德載光兩雛軒軒一覽一祥五采旣備德輝乃翔中道折翅爲孤鳳皇方井之陰龍虎回斡幽宮廣輪授茨番闕輿藏馬反禮葬非渴誰與刊名慈母所揭

右墓誌銘杭世駿撰

顧成天

上以蔡宗丞嵩依附年黨因籍其家得顧太史成天詠星星草詩
 稟疑其語涉譏諷 命蔡索其全集進呈見恭輓 聖祖詩云已
 過虞舜巡方日尙少唐堯在位年之句 上因之淚下曰草莽之
 閒乃有此忠臣耶因 召入 特賜編修 命直上書房以示寵
 異云

右錄宗室昭榘撰

松江顧小厓成天公車至京寓宗人府丞蔡嵩宅雍正七年嵩緣
 事逮問簿錄其家 上覽顧詩稟有 聖祖輓詞六章 上淒然
 墮淚 命江南巡撫送部引 見八年至京時庚戌科會試已過

欽賜爲編修列名入於是科庶吉士之前人皆以爲奇遇

右記余金撰

雍正八年庚戌一甲授職外顧成天胡宗緒二人俱卽授編修點
庶常外用額外主事五十八人其餘分頭等四十二員中等六十
二員次等九十八員願就教職者四十八員不用者一員宋長城
右茶餘客話阮葵生撰

上海顧少詹以康熙丁酉舉人擢用翰林官至四品其遇甚奇雍
正七年閏七月 世宗查閱蔡嵩寓中筆札見有顧成天皇城草
詩一首寄情寓意似有查嗣庭呂留良諸人感憤譏刺之心因傳
旨詢問蔡嵩顧成天平日有無詩文著作於是續查出顧成天

所刻詩一冊中有 聖祖仁皇帝輓詞六章詞意悲切 上覽之
淒然墮淚 諭稱以未登仕籍之人懷感恩戴德之誠惻則其秉
性善良居心忠厚可知皇城草一詩乃別有寄託爲不如己意之
人而作因行文江南督撫將顧成天送部引 見聽候錄用成天
遂仰蒙 眷眄游陟清班 先聖皇之慶賞刑威不設成心如此
右紀聞陳康祺撰




儲晉觀

君諱晉觀字寬夫號恕齋常之宜興人先世系出唐侍御史光義自金沙遷居宜興曾祖某祖方慶康熙中以進士知山西清源縣有治行父在文官翰林院編修負文章重名學者稱爲中子先生君生而聰穎少時已露頭角中子先生極鍾愛之弱冠補縣諸生中康熙庚子科副榜貢入成均文名日起雍正壬子偕兄傳泰弟鼎泰同舉於鄉明年成進士廷試高等選入爲翰林院庶吉士乾隆丙辰散館授編修奉命纂修國史朝廷開明史綱目館簡詞臣之雋者充秉筆任君復與焉戊午分校北闈己未分校南宮胥稱得人君旣居史職思以文章報國珥筆之暇輒濡首研

北終日矻矻如經生未嘗一事干謁以希進秩朝士咸重其品槩而君因積勞致疾纏綿歲餘竟至不起以乾隆壬戌年某月某日卒於京邸距始生之歲僅閱春秋四十有四君家門籍清華祖父俱爲當代聞人君胚胎家學壯歲獲登上第爲天子侍從臣其遇不可爲不達矣君顧內念欲然彌自策勵力圖有所表見以光大先業而二豎忽侵中道摧折有榮遇而無永年不克大展懷抱嗚呼命又何其蹇耶君內行修飭昆弟閒友于甚篤性和婉語言恂恂若不能出諸口酒酣以往或與談藝則頭沒杯案才辯恣涌滾滾不竭常至麈尾奮擲殘唾侵及人面不顧也與人交一本誠誠久而不渝長予十餘歲辱稱莫逆交當君里居時詩壇酒社過從靡閒丁巳歲予浪游京師君款予邸舍情意彌摯念予遭遇潦倒時命酒飲予必使盡歡所以慰藉予者甚至且申他年青山黃髮之約予重感君意至爲泣下未幾別君南返未及十年予之潦倒如故而君已奄然不可作矣嗚呼痛哉君於詩最喜吳梅村錢受之兩公得意處時時近之所著有雙溪草堂集若干卷藏於家娶郁氏繼娶許氏無子以兒子寶書爲嗣年少工文中乾隆辛酉科鄉試扶君之柩歸葬於某原銘曰君生也負令名和其聲鏘然鳴騰上苑銜春英俄塌翼歸幽冥千秋萬歲不復醒我爲誌銘雙淚傾

右墓誌銘史承豫撰



宋栢

予別峯山者十年丙寅之冬小住長洲遊靈巖遂入天平之麓故人陸茶塢招予於其園聞峯山館在木瀆村落近相接乃訪之峯山一見狂喜畱予飯能同過予茶塢之水木明瑟園清勝甲於吳中峯山顧而樂之而與茶塢傾倒如舊相識烹魚沽酒縱談於古藤架下是夜清暉如畫峯山謂予曰善哉子之不仕也吾固知子非風塵中人也然異哉子之不仕也吾終疑子非槁項黃馘人也相與大笑漏四下止之宿不可竟去相約以次年之春再會於是園因爲洞庭西山之遊及期予未至君亦歸不數月而以病卒峯山爲人坦率而易直顧其神明蕭灑別有絕俗之韻撓之不濁其

爲庶常也一日院長集其儕而告之曰諸君甚清苦有厭承明之廬者否天子方求可以守襄陽者吾當列上之峯山揜耳而走曰斯言何爲至於我哉院長哂而弗咎也及校書殿中辰入酉出落落自喜不乞靈於要人之門旋受宮坊之擢且駸駸進用念其父年高遂請歸養既歸而無以爲養乃授徒於長洲時下江撫軍陳可齋故同年同館也峯山不一過之撫軍聞其至遣人通殷勤峯山謝曰吾館去城三十里俟有入城之便當造謁然竟不入城也吳人皆歎以爲不可及峯山雖以甘旨之故不能不出而授徒然其晨昏之慕形之夢寐其課子也每日授以經史之學暇則使之習書不令爲科舉之業故年且二十而未應試曰吾待其學成則此小技者易易耳莫使八識田中先下稗花種子其論詩文最嚴故矜慎不冒苟作既成必有邈然之致不可以褻視者然不輕以示人而於子則有阿私之好云峯山姓宋氏諱柎其字曰丹林浙之嚴州府建德縣人也雍正癸丑進士累官右春坊右贊善曾祖某祖某父某 敕封翰林院檢討娶某氏峯山生於康熙某年某月某日卒於乾隆某年某月某日春秋五十有二子某峯山之死也其子哀而毀吞金幾斃幸而甦其父遂狂號而病以卒嗚呼峯山而有罪歟天乎吾知其無罪也然則何以天之禍之酷也乃爲文以哭而銘之其辭曰

引身以養父乃不及終其天年離經以課子竟不及盡其薪傳嗟

三命之荼毒兮抱九地之沈冤質之梁父與亢父兮亦曰莫知其然而然

右墓誌銘全祖望撰

劉元炳

劉元炳字叔文號碧崖湖南湘潭人雍正癸丑進士改庶吉士授職檢討有碧崖集叔文性恬退散館後卽乞假歸不復出家居四十年里人罕識其面

右沅湘耆舊集小傳鄧顯鶴撰

公以文章知名當世性和易與人交胸無城府優游林下四十餘年卒

右述聞謔瑤錄



張宗說

張宗說字蓬宰河南夏邑人生而穎異少孤母夫人呂氏授以經書踰年徧讀十五歲遊庠旋拔貢登進士入翰林先是 朝廷慎重館選歷癸甲丁庚河南詞臣無考取異等者宗說名在第三引見都下傳為中州破天荒云在中祕肆力於古思振興詩學上繼北地信陽掌院方苞歎為中州之雋館課積勞卒年才三十七性最孝母病目晨夕舐以舌得愈卒時猶口呼母不置也所著怡雲草堂詩若干卷

右傳查岐昌撰

按張公雍正十一年進士

欽定四庫全書

草堂詩話卷之九

此本世傳自其父... 欽定四庫全書

亦此詩... 欽定四庫全書

景藩丁... 欽定四庫全書

重... 欽定四庫全書

... 欽定四庫全書

... 欽定四庫全書

曠敏本

曠敏本

曠敏本字魯之湖南衡山人乾隆丙辰進士改庶吉士未授職歸不復出以經學教授里中為嶽麓山長最久著述甚富有岫嶠集學者稱岫嶠先生弟敦本字遜之丁巳進士授寶慶教授與兄齊

名

右沅湘耆舊集小傳鄧顯鶴撰

公以經學造士著述等身於易書尤粹弟敦本名相埒時有軾轍

之目

右述聞謚瑤錄

國朝詩人及名不絕
卷一百一十一



全祖望

全祖望浙江鄞縣人十六歲能為古文討論經史證明掌故補諸
生雍正七年督學王蘭生選以充貢入京師上侍郎方苞書論喪
禮或問苞大異之旋舉順天鄉試戶部侍郎李紱見其文曰此黃
震王應麟以後一人也乾隆元年薦舉博學鴻詞科是春會試先
成進士改翰林院庶吉士不再與鴻博試二年散館歸班以知縣
用遂歸不復出方詞科諸人未集紱以問祖望祖望為記四十餘
人各列所長乃彙為詞科摭言一書先以康熙十八年百八十六
徵士接以今科采諸人所著入之已成大半會將歸未卒業僅得
前後姓名及舉主試錄三卷性伉直既歸貧且病饔飧不給人

國朝詩人及名不絕
卷一百一十一
詞臣十二

七

所餽弗受主蕺山端溪書院講席爲士林仰重二十年卒於家年五十有一祖望爲學淵博無涯涘於書靡不貫串在翰林與李紱其借永樂大典讀之每日各盡之十卷時開明史館復爲書六通移之先論藝文次論表次論忠義隱逸兩列傳皆以其言爲題家居後修南雷黃氏宋儒學案校水經注續選甬上耆舊詩所撰有丙辰公車徵士小錄漢書地理志稽疑又有荅弟子董秉純張炳蔣學鏞盧鎬等所問經史疑義錄爲經史問荅十卷議論淹貫足啟後學

右 國史館本傳

全祖望字紹衣號謝山小字阿補鄞人年十四補諸生始謁學宮至名宦鄉賢祠見謝太僕三賓張提督杰木主曰此反覆賣主賊捶之不碎投類池雍正七年充選貢入都上書禮部侍郎方苞論喪禮或問侍郎異之由是聲稱藉甚十年舉進士不第工部侍郎李紱見其行卷曰深甯東發後一人也十二年 詔開鴻博大科膺薦者二百餘人集都下祖望譽最高徐相國屢招致之不往遂深嫉之乾隆元年成進士改庶吉士十月大科 朝試相國以祖望故特奏凡經保薦而已成進士入詞林者不必再與鴻博之試祖望負氣爲五六天地之中台賦擬進卷二首挾漢志唐志之微出與試諸人右當事者益嫉之明年散館列下等外補祖望性伉直不能容物先嘗患齒痛妻張因事相規笑曰此雌黃人物之報

也卒不改至於放黜既南歸丁外內艱服除不復謁選性好聚書弱冠時登范氏天一閣謝氏天賜閣陳氏雲在樓遇希有之本輒借鈔入都鈔書不輟坐是因乏以行篋書二萬卷質於黃監倉然猶就永樂大典取所欲見而不可得者分例爲五一經二史三志乘四氏族五文集簽鈔之及放歸重登天一閣借鈔不輟家益貧饔飧或不給冬衣裕衣惟韓江馬氏稍賙濟之主講葢山書院不數月與紹守不協固辭歸後主講端溪書院年餘以病歸乾隆二十年卒年五十一子昭德年十三先五月卒議立後而本支無其人乃立疏族孫孫桐爲孫盡鬻所藏書萬餘卷於盧姓得白金二百爲喪葬費孫桐纔七歲後亦不達祖望經學史學詩文雅擅眾

長生平服膺黃宗羲宗羲著述甚多其最傳者南雷文定於殘明碧血刻意表章祖望踵南雷之後亦刻意表章詳盡而覈實可當續史其七校水經注半在趙一清本中困學紀聞三箋嘉慶初屠繼序得本梓於廣再梓於浙學政阮芸臺得經史問荅史夢蛟得手定本鮎埼亭集並梓於浙外集詩集亦漸次梓行余觀古今宿學有文章者未必本經術通經術者未必具史裁服鄭之與遷固各自溝澮步趨其一足千古矣祖望殆兼之致難得也當事者不善護持至使終身放廢人既阨之天亦阨之然而不朽著述久必發揚仕不公卿何關輕重自祖望歿後至今五十餘年其遺書出而盛行知不知皆奉爲浙學之冠故爲之傳俟史臣之述文苑者

宋馮

右傳嚴可均撰

袁鈞云全祖望爲元立六世孫年十四從董正國學正國最持崖岸祖望每與辨論經史未嘗不稱善也里中范氏天一閣陳氏南軒陳氏雲在樓多藏書徧閱之復從武林趙氏小山堂借取未見學益沈博以選貢入都與侍郎方苞論禮苞大異之由是聲譽騰起中順天鄉試閣學李紱見其行卷目爲深甯東發後一人乾隆元年舉博學鴻詞是年成進士改庶常明年散館歸班外補遂歸主講越之叢山粵之端溪亦時往來武林維揚間祖望負氣忤俗喜雌黃人物究心鄉邦文獻嘗續李鄴嗣耆舊詩做其體人各爲傳蒐采極博別白品類極嚴他所著書十數種皆卓然可傳學者稱謝山先生

右正雅集符葆森錄

先生十四歲補博士弟子十六歲應鄉試以古文謁查初白初白謂萬九沙曰此劉原父之儔也十九歲登天一閣借書初入京上書方靈臯先生論喪禮或問靈臯大異之二十八歲舉北京鄉試臨川李穆堂見先生行卷曰此深甯東發以後一人也招之同寓三十歲續娶曹孺人於京師長安米貴以行篋書二萬卷質於仁和黃監倉有春明行篋當書記三十一歲居京師詞科應詔二百餘人多與先生通縞紵先生因得盡其人之文章學術乃彙爲詞

科摭言一書廣采同譜諸公所著入之會先生放歸未卒業三十
二歲成進士入庶常館與臨川先生共借永樂大典讀之三十三
歲散館左遷外補九月南歸三十四歲重登天一閣搜括金石編
爲天一閣碑目冬下太公艱三十五歲冬接丁蔣太夫人艱三十
七歲秋至白下歲暮歸經揚州止宿馬氏畚經堂成困學紀聞三
箋四十一歲續選甬上耆舊詩四十二歲修南雷黃氏宋儒學案
四十四歲主蕺山講席四十五歲校水經注杜守仍請主蕺山先
生固辭蓋主人微失禮也四十六歲仍校水經注四十八歲東粵
制府以端溪書院山長相邀遂度嶺至端溪水經注蓋已七校矣
四十九歲自粵歸家養疴猶以水經注未卒業時時檢閱五十一
歲手定文彙刪其十七得五十卷六月臥榻不復出戶呼純至榻
前命檢所著述總爲一大麓顧純曰好藏之而所鈔文集五十卷
命移交維揚馬氏叢書樓七月卒

右董秉純所撰年譜張維屏錄

紹衣散館歸班負氣忤俗有風節其學淵博無涯淡於書靡不貫
穿所著書皆有補於文獻有讀易別錄孔子弟子姓名表漢書地
理志稽疑公車徵士錄詞科摭言續甬上耆舊詩

右名人尺牘小傳梁同書撰

經學史才詞科三者得一足以傳而鄞縣全謝山先生兼之先生
經史問答實足以繼古賢啟後學與顧亭林日知錄相埒

右挈經室集張維屏錄

謝山先生博洽淹通勤於蒐討鄉邦文獻尤所究心鮎埼亭文集
中每紀述忠臣義士以及名卿碩儒其行文頓挫激昂自有一種
不可磨滅不可遏抑之氣而其閒或敘次過繁或稱揚逾量亦閒
有之然先生之意欲存其人之性情面目故縱筆所如甯詳毋略
統觀所撰謂之史才復何愧焉所著經史問答及困學紀聞三箋
七校水經注皆足見先生汲古之深而余所服膺尤在文集

右聽松廬文鈔張維屏撰

謝山先生以翰林改外宦情韻淡李穆堂侍郎勸其就銓先生呈
以詩曰生平坐笑陶彭澤豈有牽絲百里才秬未成醪身已去先

幾何待督郵來後 高宗南巡梁文莊公將薦之亦以詩代柬辭
謝有故人代我關情處莫學瓊山強定山之句名山著書自有千
古鞞塵手版豈我輩所優爲僕爲飢驅孟浪一出洵有愧鄉邦先
正多多矣

後鴻博科吾浙方聞博學之士浙東推謝山浙西推董浦猶康熙
大科之有秀水蕭山也康祺少時則聞董浦負謝山於死後而未
得其詳頃讀先師徐先生煙嶼樓文集有記杭董浦一篇謹節錄
之曰始二人以才學相投契最爲昵密客京師維揚無一日不相
見談笑辨論相服相稱歎數十年無閒言也旣而謝山膺東粵制
府之聘往主端谿書院董浦同時爲粵秀書院山長謝山自束脩

外一介不取雖弟子饒時物亦峻拒之而董浦則捆載湖州筆數

百萬乞粵中大吏函致其僚屬用重價強賣與之謝山貽書規戒

謂此非為人師所宜不聽謝山歸以告揚州馬氏兄弟他日董浦

至馬氏秋玉昆季甚詰責董浦董浦不敢辨而怨謝山切骨而謝

山不知也謝山既卒其弟子如蔣樗庵董小鈍諸君念其師執友

莫董浦若乞之銘墓董浦使來索遺集與之久無報章屢索還遺

集終不報而董浦道古堂文集雕本出矣諸君視其目有鮎埼亭

集序忻然檢讀則若譽若嘲莫解所謂細繹之又似謝山有敗行

者皆大驚怪世有以徐先生言為太過者試一考全杭交誼並取此序閱之又徧觀其他文則竄

謝山文為己作者六七篇於是知董浦賣死友而不知其賣之之

故既而有自維揚來者道其詳於樗庵始恍然大悟其後樗庵弟

子有鈔鮎埼亭集而以杭序冠首者樗庵見之大怒乃手記董浦

負謝山始末於序後而此書後歸徐先生故先生詳述之如此樗

庵固不妄語徐先生亦不輕詆前輩者且董浦粵游集每有以湖

筆饋某官詩其文集中考据論辨之作頗與鮎埼相出入然則才

如董浦竟有文無行至此亦可喻矣按他書稱董浦性嗜博夏月袒小衣入茶肆與里少年游

諄叫拍張各不相識適學使者輿遇偶見之頷而去眾驚問則曰我衙門中後輩也同博者始知為董浦觀此則董浦之行檢通倪

本與謝山異趨愛其才而與之比仍謝山之過也

幼時讀吾鄉全謝山先生祖望鮎埼亭集知先生舉乾隆丙辰博

學鴻詞有齟之者謂曾入翰林不得與試後考鶴徵錄等書丙辰

學鴻詞有齟之者謂曾入翰林不得與試後考鶴徵錄等書丙辰

徵士二百六十七人早官翰林者不一而足卽欽取一二等中諸
錦周長發程恂皆庶吉士補試之張漢且檢討而正試一等第四
之于振且雍正元年狀元授職修撰者也何獨於先生而尼之後
閱館選錄始知諸錦諸人已改他官不在文學侍從之列故得觀
光大典時諸已改教授于改行人周改教諭程改員外郎張改知
府已去官先生適丙辰通籍試鴻博時正新爲詞臣擯不與試其
意則私而其論則公也

右紀聞陳康祺撰

夏之馨

乾隆之五十年醴谷夏先生以疾卒於高郵里第得年八十有八
越明年孫味堂等奉先生暨徐孺人之柩合葬於天長畚麓莊之
原去神居山十里而近未銘也又明年味堂赴禮部試見敦和於
京師而謁之銘敦和老矣於門弟子中屬當後死之責又奚忍辭
獨念先生當六十時曾倣史家自序之例序其生平累累千餘言
今載在集中於事皆詳實敦和今日執筆豈敢有加焉惟取其軼
於自序之外者綴補之如左先生年三十而舉於鄉丁未之會試
也相國尹文端公以編修爲同考官得先生卷而大愜先是甲辰
會試有續榜而是科闈中仍以續榜請卽欲藉先生以爲續榜光

既而得 旨停續榜先生名遂落尹公乃大梅先生嘗曰尹公愛我乃逾於獲雋者篇中序國士之遇闕尹公則以公方開府江南恐涉攀援故也癸丑成進士隨以詞科入翰林研經考史一以齊息園侍郎爲歸他如任釣臺之論禮器諸草廬之論山栲隰柎杭堇浦之論史表闕誤先生述之終其身津津不置同館之外則尤重胡徵君雲持蓋先生虛懷樂善出天性於己不諱其所短於人務盡其所長無論同輩名宿卽後生一字之工傾歎不容口有好爲瑕疵者輒付之不荅嘗置一大篋凡往來投贈以至零章斷句皆嚴弄而寶藏之暇時一一出以自娛客至並出以娛客曰吾以當琴弈也其典闈試時既得梅崖卷讀之殊奧澀而易書者乙黜

譌誤幾不可以句先生入夜統統四鼓矣案頭兩燭光如豆爲之平心反覆卜度漸得其所以言之意未幾暢然通浹方擊節稱快而燭光涌出高寸餘遂定爲第一其督學於廣韶於湖南一切高才生能自占甲乙者先生未嘗以爲功惟務求沈冥晦默之士如南海之鄧生鎮平之何生皆淺落窮老人無過而問者最後乃有武陵之彭生彭生者性樸茂而家酷貧於諸經尤好三禮每歲刪節注疏手鈔之一過手鈔者已二十餘過矣然孤學於經實無所通解先生曰是固然然其心苦矣吾不一拂拭而摩抄之恐虞仲翔遂無知己其時諸生聞先生言皆雪涕比先生歸田文端公猶以兩江制府駐江甯則聘先生主鍾山書院相晨夕先生畱鍾山

者十有一年以古文集屬之戴生祖啟以詩集屬之侯生學詩兩
生者都講生也承先生命芟繁蕪蕪略不顧惜而先生之集定先
生在鍾山並麗正書院在六十後爲自序所未及見味堂年譜中
按先生諱之蓉字芙蓉又字醴谷曾祖鄉飲賓宗尹祖 贈文
林郎貢生聞政博學有經世才父 贈朝議大夫州學生縣作母
陳太恭人娶徐恭人最賢持家政寬而能肅內外斬斬有法度子
三曰春曉舉人官滋陽知縣先生五年卒曰殿春殤今存者曰
餘春例貢生孫三曰味堂舉人曰紀堂桂堂皆附學生曾孫三曰
齊林嵩林雲林至先生昆季之盛海內皆識之不復詳也先生稱
詩東南垂六十年於當世無所推讓然未嘗好人同己嘗曰天下

人爲詩則人人有詩於書則斷推朱郡丞鹿坪敦和在粵爲諸生
先生三置之第一丁卯之役既報罷先生爭之於主文者之前兩
主文皆俯首時方伯納公在坐爲太息嗚呼可感已銘曰
先生於詩惟杜韓蘇而獨享大年則又將爲陸劍南乎筆精墨靈
聚爲福祉惟謙惟厚施於孫子神居一卷脈絡四垂暨湖不波河
淮永治

右墓誌銘茹敦和撰

附錄夏公丙子六秩自述投老殘年忽忽六十撫念曠昔愴焉興懷爲做

史公自敘之例述一生梗概以告我後昆余八九歲時不與羣兒伍聞諸兄讀古書輒竊聽之錄於矮紙中作課誦嘗隨大父食蟹匡積膏不食問何爲曰將以奉母大父喜語人曰是兒有至性比長從諸兄學一目五行可下見古人篇籍似有夙契年十九吾父見背家道中落益刻苦學問周易尚書三禮一鈔毛詩左氏春秋再鈔史記漢書節

鈔漢唐宋元明諸家文集鈔今諸本具存凡詳批密注逐
加丹黃者悉吾二十歲以前所誦習也大父嘉子好學鍾
愛特甚頻以衣衣我以酒食勞我時值歲祲益貧困諸兄
舌耕於外吾母屏當家計日苦不給予與嘯門居一柳書
屋中枵腹伊吾不敢使母知時或分半餅作食日當午忘
櫛髮盥面寒夜無膏油嘗擁被坐月光下手持一編冥思
苦吟不知雞之三唱不西歲與嘯門同人入鄉學明年渡湖
館龍岡吳氏地僻無交游得縱觀古人之書積勤致疾鼻
血涌出左目不見物歸而調息者歲餘得復明乃更銳意
進取與同學羅君睿思茅君心友輩聯文社張設旗鼓各
不相讓予性喜樸素衣服不求靡麗少時一布袍服之近
二十年兒輩每以爲言予曰人之重輕豈關服飾大凡內
不足乃借資於外每見後生冠綦鮮好者卜其中無有也
飲酒可三升許食不計豐腆醴菹鹽豉怡然甘之一切絲
竹之娛禽鳥之玩皆深惡痛絕非其所好足跡所經及天
下之大半其在北者爲齊魯燕趙在東南者爲吳越閩南
粵楚豫所過名山大川如趙岱匡廬金焦武夷祝融羅浮
九疑太室少室以及南海之大盤江之長沅湘之清錢唐
之壯黃河之闊洞庭彭蠡震澤之汪洋蕩汨或登陟其巖
或挂帆蕩槳於蘆洲蓼渚之曲遇會心處悠然神遠尤喜

中夜欵乃聲以爲霜清月白聽之生人遐想也遭時聖
明四膺衡文之任所在拔孤寒遶英俊砭俗已庸立之準
的紫奪朱者斥之鄭亂雅者黜之當時士子有爲駢語頌
予者曰機優雲劣辨以幾微虛後王前處之確當蓋實錄
非虛語已且其爲功也有不止於文章之事者當在程鄉
時平樂令某黨於鄉之豪暴誣諸生姚泉張湘以下七人
罪幽之囹圄凡六閱月數請禡子廉得其狀按郡日趣赴
試爲令所格不得前復嚴檄之三日乃至至則髮長五六
寸僂僂然盜囚也諸生號哭伏地陳冤狀子爲力請於中
丞策公得釋令旋奪有平樂人謬欲以生祠祀我當在岳
州時華容令某貪酷吏士民疾之如仇子校士演武廳突
擁千餘人環控聲言令且出當羣毆之眾口洵洵莫敢誰
何予從容下階立此之曰爾輩何爲將爲散法之民耶歎
法者當斬亟還其贖眾俯首避去後中丞開公欲按其
以狀詢予覆之曰所謂干餘人者蓋環立觀射者耳贖已
還無由得主名者也事遂寢未幾令亦奪官是其爲功殆
亦不止於文章之事也先是子秉鐸鹽漬值歲荒憲司委
令捕蝗查飢戶平糶糶給南北二廠糜粥隨在整飭皆有
裨益生平明國士之目者四人十九歲時從西受王先生
遊以傳遊見許批予文曰視之若近卽之始遠眼中未見

如此人癸丑捷南宮謁座主溧陽任先生謂予曰子之文
 在近日為廣陵散矣為嘉歎者久之丙辰擬南郊瑞雪賦
 孝感涂先生一見嗟賞目為軼才即保送鴻詞科甲子列
 試差第一鄂相國西林謂予文蘊藉深遠迥出時輩此四
 先生者品隲各殊而叨國才之目一也生平知己三人少
 未聞道多汨溺於詞章迨與王君書臣交從事濂洛關閩
 之學戲言戲動必正色規之此直友也滇南傅君謹齋子
 同年生儼居近三載龐鴻之氣入我肺腑此諒友也息園
 齊君博雅之士每與商推經史窮源竟流若繩貫而璣組
 此多聞友也孔子所云益友不綦備矣乎生平所得士凡
 四人其一為鹽城樂甯侗字孩大品端學邃力追古人今
 以明經老矣其一為建甯朱仕琇字梅崖甲子科所取解
 元也其一為南海茹敦和字三樵本浙人僑居粵東今成
 進士其一為山陰周大樞字元木壬申北直鄉闈本房卷
 是皆沈冥幽默不求聞達之士而吾獨於語言文字外窺
 其本原識其底裏摳衣北面用以自豪然終不敢以門弟
 子之禮禮之者也昔人嘗言險厄中有鬼神子親歷之丁
 酉鄉試病臥號舍中聞有呼起起者再少頃嘯門至以藥
 湯迫予飲甫起而壁崩得免壓焉泊蘇州寶帶橋颶風作
 船纜絕皆黑中掀蕩十餘里得於沙尼之止比曉閱視則

上下亂石齒齒僅一隙可容舟粵東院署舊有祠祀鬼之
 無主者數為厲以文禱之跡遂滅過洞庭湖驚風拍天遙
 見波濤中二巨人逐水面行如飛既乃掠舟去此類聖賢
 所不道而事蹟彰顯如是天道恢恢亦可畏哉予素以迂
 拙自守與人交不為谿刻嶄絕之行亦不喜發人陰私有
 欺我者雖覺未嘗發露下逮賊獲悉御以寬見人不足恆
 矜憐之縱解推無多而意常有餘不善營殖亦不工會計
 凡器用價直之低昂米鹽出納之多寡惟人指搗不屑屑
 綜覈然財用竭則復來生平亦未嘗匱乏少學為詩十二
 歲詠中秋月即為大父所賞嗣官翰林與諸公酬倡無虛
 日在楚粵間題詠尤富始宗少陵繼瓣香於玉局今則以
 陶韋為歸宿矣所著詩二十卷古文八卷經解八卷史論
 十一卷雜記八卷俱已成賦近復手自料揀稍不愜即重
 加釐正歐陽子有言吾不畏先生畏後生耳正今日之謂
 也予所居宅即鶴來堂舊址大父所經營柳建者析箸時
 分屬吾伯今歸子宅東隙地數畝向為菜園乙亥仲春斬
 荒疏葑構別業九間短簷淨几其窗四闕中積古書數百
 卷櫺比鱗次坐臥其中足以娛老子姪數輩萃處課藝聞
 亦陳說古今夜分不寐長孫十齡解行文為條疏其義例
 幼小者牽繞衣裾分棗栗與之古云名教中有樂地誠哉

是言老而視不加既燈下能於紅箋上作細楷耳亦聰
喞私語雖遠必聞齒僅脫其二餘皆牢固蟹螯菱角尚能
自喫鬢有一莖兩莖白者拔之亦不復生腰腳甚健前登
紫琅山捫蘿躋險不見苦劫賓客譽我皆云似四十以上
人覽鏡自照無龍鍾態或者其亦非諛我也今年七月值
六十生辰兒姪輩謀作梨園之戲或云當乞言親串子笑
謂之曰嘻爾之所以祝我者未若我之自祝也昔大父入
十有五神明不衰一時欽為國瑞此於百中什一耳吾父
捐館舍時僅五十有二吾同懷兄弟七人或二十餘而卒
或三十或四十餘而卒惟筠莊兄五十有八皆未有至六
十者今獨子與嘯門兩人存而予得先周甲子緬懷往事
致為難矣况齊眉老妻翼鏤猶昔爾輩顯名科第不墜家
聲孫枝駢聯繞膝予以康健之身生太平無事之日仰蒙
帝澤退歸鄉園坐半舫齋于子徐徐看花翫月但酌我大
觥我樂已極何事枌榆子弟耶至親串壽言大半敷陳套
語其於我一庄力學之勤秉性之儉居官之慎取友之端
待物之誠邀福之厚未必能如自道者之親切有味也用
是約撮梗槩具述於斯以為今日祝嘏之詞也可以為他
日作行狀作墓誌之
取資也亦無不可

先生天才宏放於風騷之旨上下數千年間能窺其源流正變之
所在一時壇坫諸公莫不斂手推服丙午領鄉薦旋官鹽濱教諭
勛以端品立身之道復會城鄉遠近之士考其所業輯為興藝錄
任滿入都成進士薦舉鴻詞官翰林甲子典試闈中次年督學嶺
南於治經外示以古文之學錄為汲古編戊辰移節湖南造士一
如在粵東時復論次其文為湘南汲古編先生星軺所至綜所見
聞繫諸篇什著有駢征集後解組歸主講鍾山麗正書院憐才愛
士孜孜如不及盛名耆德實為海內所矜式

右鶴徵後錄李富孫撰

集中有三不可忽詩自注云孝感先生謂天下無可忽之人世間

無可忽之事此生無可忽之言作此以代書紳孝感先生蓋熊文端公也

右聽松廬詩話張維屏撰

諸錦

秀水諸先生諱錦字襄七進士官至贊善著毛詩說二卷以小序爲主序文惟存首句用蘇轍之例不釋全經惟有所心得則說之用劉敞七經小傳例也首爲通論九篇上卷周南至曹風所說凡五十八篇下卷幽風至商頌所說凡二十七篇疏證旁通時有新意而附會古義強經從我者亦在所不免焉又有補饗禮一卷以周禮補儀禮無訾於不類而分注之傳記證佐天然咸有條理尤非牽強附會之比雖寥寥不滿二十策而古典所存足資考證焉又有夏小正詁一卷

右學案唐鑑輯

先生出臨川李公穆堂門下生平博聞強識詩法山谷后山而志節傲然甘寂莫守耿介權貴之門徵逐之地未嘗一至蓋古之聞人而世之畸人也

右蒲褐山房詩話王昶撰

襄七檢討性情迂傲有弟子求題圖先生開卷見齊次風侍郎周蘭坡學士先題矣乃大書曰齊次非吾偶周衰尚有髭兩人都已寫何必我題詩

右隨園詩話袁枚撰

錢文端云草廬少時家貧無買書貲聞吳下書賈某愛客詣之畱數日主人敬其好學謂曰觀君舉止欲讀竟此架上線裝耶草廬笑而頷之三日靡不徧覽顧俠君張匠門未第時聞而訪之為之延譽名遂諫吳下

右正雅集符葆森錄

朱文藻曰草廬畱心耆舊手輯諸家之詩題曰國朝風雅凡十二冊未經編定付刊

右兩浙輶軒錄張維屏錄

按諸公雍正甲辰進士由庶吉士改知縣就金華府教授乾隆

丙辰召試博學鴻詞科列高等授編修遷贊善著有絳附閣集



周長發

長發詩才敏捷富贍有餘而微傷於快 四庫提要

學士曾賦覺生寺大鐘歌應 制稱 旨揮毫敏捷不亞張宮詹

越風

長發知廣昌縣邑久雨山水驟漲城垂沒以黃紙書銜鈴以印朝服登城稽首哀籲願以一令保闔城赤子雨霽水消城內外無恙 山陰縣志

右正雅集符葆森錄

會稽周學士長發雍正甲辰進士改庶吉士散館以知縣用尋改教職乾隆丙辰 召試重入詞館奉 命祭告嵩華江淮吳山等

處乞假省母 恩賜內緞豐貂令歸為母壽極儒臣之榮

右記余金撰

按周公字蘭坡號石帆著有賜書堂集

山陰縣志

無登湖海自哀陰隱以一身於國無取于兩澤水雷其內於無恙
其為國體昌輝出入而山水之靈致以黃龍書卷餘以印時

賦風

之士自城湖主若大願湖湖 補辦 自輯字源對不亞張宮飲

又知有木好對有漢許錫而如錫飲知 四庫全書

國朝耆

任端書

任端書字念齋溧陽人尚書蘭枝子蘭枝父文煒官無錫教諭遂家無錫端書乾隆二年進士第三人官編修丁父艱歸遂不出優遊林下二十餘年所著有南屏集山陰胡天游天台齊召南極稱之

右傳秦瀛撰





梁啟心 嗣子同書

君名啟心字首存一字葭林谿父先生長子也家世錢唐自君爲
學官弟子隸籍仁和少負清才與弟今少師有二難之目吾杭文
體日趨於骯髒左塾之師虞庠之彥以甘辭軟調邀取時譽而君
獨知問學覃思閉戶默而深湛循歷曲折時時躡曾王之閫奧文
品峻潔如白雲在空孤鶴警露同時接跡而起者嚴在昌之清奧
任應烈之精切孫灝之窈窕密栗陳兆崙之偉麗雄奇皆能開設
壇坫推倒一世而心每懾君爲畏友少師旣得氣以去君戰藝於
棘闈屢誦茶陵彭少詹來視浙學名冠一鬢交河王學士拔君於
五百人之中貢入太學隨計入京師非其好也歲在壬子始舉於

鄉又八年而成進士改庶常例當俟散館谿父先生老矣少師時
 官少司寇侍從 禁廷不獲伸循陔之願君陳情乞養朝餐夕膳
 所以娛適老人者無弗至 聖天子廉其孝即家授職編修蓋異
 數也君精心計家不名一錢赤手支柱方母凌太夫人寢疾葠藥
 之費至數千金棄養附身附棺盡哀極慎事皆倚君而辦既少師
 長司農晉冢宰攝揆席祿入漸豐君減衣縮食徒步里門所廩餼
 者所推解者所緩急者待以舉火歲常數百人谿父先生聞之而
 色喜曰是兒能養我志先生早歲耽詩老而彌甚耆名老德閒僧
 曠士咸參陰席而以君家為顧氏之玉山佳時勝日輕車白舫往
 來西湖之上君未嘗不撰杖以從道旁觀者太息以為先生之有

子也 六飛南幸君為頌一篇推本 國家貞元受命之符 聖
 德漸濡洋溢之廣且遠如唐臣柳宗元韓愈之所云云者進呈
 行在獨蒙 睿賞閱六年 聖天子惠我浙人翠華重莅君殫儒
 臣之職業撰詩上獻復拜宮錦之 賜君登第後未嘗一日在史
 館而宏詞麗藻與少師南北相望鸞雛鳳子之目人以方唐薛收
 兄弟先生願而樂之喜可知已歲在戊寅先生五福來備考終里
 第君哀勞逾節甫卒哭而疾作癥結於胸火炎而色墨遂至不起
 年六十有四君自乞歸以至厭代以孝始以孝終記所謂非終父
 母之身終其身也其可以無憾矣乎嗣子同書官翰林侍講幄不
 得視含斂孀媪艾妾抱三歲弱女寶君數卷之詩待嗣子歸而相

付謂可以傳君也嗚呼君之可以傳者止於斯乎

舊史曰君與余有平生之言曰我死必子銘我墓然吾不及見也
蓋及我之未即死也子姑為之余諾之而逡巡未果不意君之遽
我先也嗣子將刊君壽而以君行狀見屬漢兩司馬皆為自序班
氏祖之以為敘傳而附於所著書之末余今者次君生平將以傳
君之為人即以當君之詩序異體而同源夫有所受矣

右傳杭世駿撰

梁同書

公諱同書字元穎錢塘人嘗得元人貫酸齋書山舟二字顏其齋
海內因稱山舟先生晚歲自署不翁九十外又署新吾長翁高祖

諱萬鍾曾祖諱國儀祖諸暨縣訓導諱文濂並以文莊相國貴

贈如其官訓導公有三子長翰林院編修諱啟心次 贈太傅諡

文莊東閣大學士諱詩正次癸酉科舉人知蠡縣事諱夢善文莊

生二子長即公次少司空冲泉先生諱敦書編修公無子嗣公為

後文莊公元配孫夫人繼包繼徐公與少司空並包夫人出所後

妣許太宜人繼妣夏太宜人公生雍正元年九月二十八日生而

肥白如瓠長者頗憂其不壽文莊未達時家故貧居鳳凰山麓包

夫人夜織公兄弟方幼戲於旁虎突入戶夫人驚絕既蘇視兩兒

戲如故問之曰有大獸來四顧而去亦不知為虎也鄰里咸異之

文莊挈眷入都公留侍所後親編修公素嚴少不可意輒筆楚公

怡然順受退無怨容乾隆五年入郡庠十二年丁卯科舉鄉試十七年 恩科會試未第 高宗純皇帝 特賜與殿試成秦大士榜二甲進士改庶吉士習 國書二十一年散館授翰林院編修丙子科順天鄉試丁丑會試兩爲同考官所取必宿齒文率枯蹇文莊公見而哂曰汝安從得如許骨董耶二十三年考試翰詹諸臣公列二等擢侍講署日講起居注官是年丁所後父艱公旣淡於榮利又素鯁介恐不諧於俗服闋後引疾不復出二十八年文莊公薨於邸第公徒跣奔喪時少司空守遵義亦奉 命馳驛至文莊公之薨也子姪無侍側者邸中物及平時玩好多亡失或謂當治其事公曰此何時乃念財物耶一無所問三十五年 孝聖

憲皇后八旬萬壽公入都祝 釐迎 駕次 上顧見曰汝來乎公奏言臣足疾未愈祝 聖母萬壽後卽回籍時陳太僕兆崙與公同列退詫公 上方嚮用君奈何竟自退也五十五年祝 高廟八旬萬壽有力勸公謁時相者以禍福怵公公不可嘉慶十二年丁卯科浙撫清安奏公宜重宴鹿鳴奉 命與宴加翰林院侍講學士銜時海內重與宴者皆止加虛銜惟公獨具官名蓋公耆德清望達於 天聽久矣雖不就朝列而型式鄉閭砥柱末俗實有以助 國家培東南之元氣故能默邀 主眷如此公名德日盛大吏至者必首謁公公一報謝而止終未嘗有所干請人有以事質者告之必委曲詳盡性雖方正見人温温然接之者形神

自肅子姪侍側常囁嚅不敢言穀於自奉裘葛未嘗有副一冠數十年不易出行市人往往環視匿笑於治生頗纖悉嘗曰吾雖日爲此要於心無所係累耳生平不受餽遺畢尙書沅自楚致大研公不納使者委之而去越數年友人之楚仕者仍附以還畢人有緩急拯濟無所吝故人子以葬先世爲言公予二十金其人實未營葬半載後復來言公贈如前在側者曰此爲誑耳奈何復予公曰葬事甚鉅前所予容不足以集事其存心之厚如此杭俗好華麗喪車必以影神樓前導惟公家一依禮制儀從外無浮飾二氏之徒不入門不爲人慶壽無事不讌客皆足爲居家法顧士大夫皆心知流俗之非而卒莫有如公所行者愈知公爲不可及也十

六年冬公患腦疽危篤中見有人持楹帖入展視其句曰萬里煙雲開嶂戶一天風雨護神鑪病遂愈逾四年至二十年七月十五日卒年九十三卒前數日自書赴筆法蒼勁如平時其年冬十二月十五日葬公於茅家埠之原遵公命也大吏以公品望爲士民所矜式題請崇祀鄉賢祠得旨俞允入祠之日傾城會送前此未有如是之盛者公與少司空趨尙不同而友愛甚篤每當別輒再三握手悲不自勝少司空數歷中外不名一錢卒後官項數萬金皆公爲措納朋友世舊初終無異視見其子若孫猶惓惓不忘撫諸姪無異所生一家之中上下幾百口事無大小一稟承公六十年無敢違教令者可謂能齊其家者矣非誠肅所感而能之乎

元配汪宜人同邑水蓮先生諱惟憲次女先生有知人鑒與編修公拔貢同年公幼從受業遂訂媵焉宜人勤於持家自少至老未嘗謝息先公三年卒年九十二長公一歲公性不近內常獨宿齋中與宜人相見整衣冠如對賓客宜人性甯澹年愈高遇人愈謙下列孫行者起居亦和顏色立俟之公或留客共飯倉卒閒饌當豐潔蓋宜人夙有所儲以待也編修公每以嗣續為念為公置造室陳氏亦終其身未御年五十餘先公卒公於書法出天性十二歲即能為擘窠大字求文莊書者不得暇輒命公代書徐文穆公夫人墓誌銘即公少作書法顏柳中年用米法七十後愈臻變化純任自然名滿天下求書者紙日數束嘗言古善書皆有代者我

獨無益不欲以偽欺人我性如是然託公名者甚眾其去真蹟遠矣日本國有王子好書以其書介舶商求公評定琉球生自太學歸國踵公門乞一見公以無相見儀卻之其人太息曰來時國王命必一見公而歸今不可見奈何因向公書一紙曰持是以復國王耳本朝能書人鮮有長於大字者公作字愈大結構愈嚴九十一歲為無錫孫氏書家廟額忠孝傳家四字字方三尺魄力沈厚觀者莫不嘆絕少而工詩在翰苑時與儕輩酬唱風華雋贍其後不多作曰吾不欲求名不幸以書名為人所役豈堪更役詩耶重燕鹿鳴賦七言四篇和者數百人莫能及公於小事皆有常度久如一日尤精賞鑒於前人書畫過眼輒別真偽海甯吳生遇名

蹟每演寫其副嘗語人曰他人皆可欺惟山舟先生不可耳觀書至毫不輟精力絕人九十外視聽未嘗少衰臨卒之歲猶能作蠅頭字所著述多散佚不存嗣子玉繩搜輯得十之二三哀爲若干卷玉繩仁和縣增貢生少司空長子嗣爲公後篤學力行有介石之操著書多行於世居公喪年逾七十毀瘠有加孫四學昌錢塘學諸生耆己卯科舉人武義縣教諭衆早卒田順天府經歷宗彥娶公猶女比寓於杭嘗得侍公言論竊謂公行己誠慤似司馬君實書品風度近王逸少浙人雖婦孺皆知公名廝役扈養無不敬公者與宴日夾道觀者數萬人公不好名而名愈不可揜如此公之卒也遺命不作行述嗣子屬宗彥爲之傳因次夙所見聞於公者著之篇辭雖不文惟其實庶公之後人得因此以見公之梗槩也

右傳許宗彥撰

公姓梁諱同書字元穎錢塘人嘗得元貫酸齋書山舟二大字遂以自號並顏其齋學者咸稱爲山舟先生後自以不生不滅不垢不淨因稱不翁晚年又號新吾長翁高祖諱萬鍾曾祖諱國儀祖諸暨訓導諱文濂卽谿父先生雲璈之外大父也並以相國文莊公貴 贈如其官谿父先生生三子長翰林院編修 贈侍講諱啟心卽葑林先生次東閣大學士 贈太傅諱文莊諱詩正卽薌林先生次癸酉舉人蠡縣知縣諱夢善卽午樓先生皆雲璈之舅

氏也文莊公生二子長卽公次工部侍郎諱敦書薈林先生無子以公爲嗣文莊公元配孫夫人繼包繼徐公與少司空皆包夫人出其所後妣許繼夏以公階封太宜人公生而穎異性端正雖與羣兒嬉不作騎危據地之狀年十八補弟子員二十五中乾隆十二年丁卯鄉試是科少司空亦捷京兆三上春官不第十七年壬申恩科榜已放文莊以協揆乞養未行少司空蔭補部郎留京供職命公將行李先出都行有日矣聖駕駐驛湯山知公未售傳旨詢公名屬車無知者最後太僕孫虛船先生聞之始繕名入奏公以貴公子而朝臣罕知其名其平日恬靜韜晦不屑爲聲氣之求於斯槩見蒙恩賜進士一體殿試改庶常習國

書十九年甲戌散館授編修丙子丁丑兩充同考官戊寅大考擢侍講署日講起居注官是年谿父先生棄養諱林先生以毀卒公丁父艱嚴寒跣奔坐羊頭車失足落河岸幾殆時文莊公已內召乞假營葬公竭蹶襄事諱林先生柩厝湖莊發引之日公扶服悲號流涕被面哀動行路雲璈時雖幼猶能記之而知其悲也服闋後以足疾不出二十八年癸未文莊公薨於位奔喪入都少司空守遵義方奉命回京未至文莊公邸第無人又以微疾遽薨倉卒中服御多亡或言當窮其事公曰此時尙念財物人其謂我何一無所問人服其識量公自文莊薨後無意出山三十五年冬孝聖憲皇后八旬萬壽公入都祝釐迎駕上願見曰汝

來補官乎公叩首奏臣足疾未痊祝 聖母萬壽後回籍時陳句

山太僕與同列既退詫謂公曰 上意方嚮用奈何遽以回籍對

公曰實有足疾何敢欺也五十五年祝 高廟八旬萬壽有勸公

必謁時相者忱以禍福公毅然不顧卽日出都嘉慶十二年丁卯

科浙撫清安奏公重宴鹿鳴 恩加翰林院侍講學士銜時海

內重宴者皆止加級公獨晉階耆德清望早徹 九重故能深結

主知獨蒙異數雖家庭之慶亦鄉邦之榮也宴日公賦紀 恩

詩四章一時和者甚眾十六年冬忽瘍發於首幾不救後竟無恙

以爲神仙歷劫從此再可五百年孰意二十年秋感微疾遽卒實

七月十五日也年九十三元配汪宜人爲積山先生之女賢能著

於鄉里戚黨閒多奉爲師法吾母寓揚州每懷故土宜人嘗迎至

家飲饌寒暄侍之惟謹視雲璈亦如小弱弟至則如歸外內井井

所以佐公者無不至先公一年生先公三年卒年九十二公輓之

曰一百年屈指光陰天何吝此七十載齊眉夫婦人孰如之人皆

傳誦而上句乃轉爲公恨也 妾陳氏早卒卽於是年十月援古

大夫三月而葬之期合窆於茅家埠之原臨沒手書赴槩斟酌字

句可謂能了生死之際者矣無子以少司空長子玉繩爲之後公

孝友性成視猶子如所生諸子亦奉命毋敢怠出告反面同於嚴

君公雖生富貴性儉約如窶人子一冠數十年不易偶出鄰里望

見其冠無不知爲公者然益以此重公無敢匿笑其自奉大率類

是戚族緩急及義所當為則傾囊不吝有故人子先世無以為窀
 穸公屢助之而不知其終未營葬也其誠以待人如此公書法超
 絕前後名滿天下雖兒童走卒皆知公書然於此每見其風骨某
 相國使於浙欲得公書知其耿介不自請而屬之錢唐令令亦無
 能達其意乃使人徧索裝潢冢得一冊強酬之值以獻而終未敢
 踵公之門吳門有富賈自附於士大夫求公書墓碑以千金為壽
 公拒之又琉球生自太學歸國過浙奉其王命乞一面公以無相
 見儀卻之此豈尋常文士所可企及哉地方大吏有舊者來則報
 謝而已從不干以私詩文清峭拔俗往往為書名所掩丙子分校
 北闈有丹陽彭澧出其門彭固江南老宿與王已山齊名計公就

外傳時其文已膾炙人口來謁公與論制藝源流且言近今貌襲
 成正者如腐木溼鼓子善為變而能夠取其神故佳彭躍然起曰
 澧以為師少年科第偶得澧耳未必真有針芥者今知師於此固
 三折肱也公唯唯左右皆驚其狂公雅不欲與人爭名所作隨散
 無定本嗣君蒐羅分類梓以行世僅十六卷所佚固不少也子一
 卽玉繩貢生孫四學昌錢唐學生嘗舉人武義縣學教諭眾早卒
 田順天府經歷曾孫四遺命不開弔不作行述嗣君皆遵行之
 張雲璈曰公沒之四年雲璈始自湘潭解組歸拜公於墓下先是
 傳公者有許比部宗彥已刻於公集簡端雲璈自壯至老親見公
 之行事聞公之緒論容有比部所未盡知者故縷記之以著於篇

憶數十年中每自揚州暫歸寄公廡下或一月或十餘日公嘗縱
言汎論凡中朝掌故海內文章故老之傳聞前人之軼事茶香鎿
影之閒娓娓不倦聽之如讀異書自薄宦以來此景不可復得而
今竟長已矣先哲云亡前塵如夢能無泣然

右傳張雲璈撰

山舟性不近婦人不宴賓客亦不赴人之宴故余寄詩云一飯矜
嚴常選客半生孤冷不宜花

右隨園詩話張維屏錄

梁山舟同書文莊公子也官侍講卽引疾歸善書法遠近馳名日
本朝鮮諸國貢使爭以重價購之論者謂近日善書者劉石庵相
公樸而少姿王夢樓侍讀豔而無骨翁覃溪撫摹三唐面目僅存
汪時齋謹守家風典型猶在惟公兼數人之長出入蘇米筆力縱
橫渾如天馬行空汪文端張文敏後一人而已

右錄宗室昭榘撰

錢塘梁侍講初字元穎偶得允貫酸齋行楷山舟字揭之軒中士
林遂稱山舟先生後陽羨任禮堂過雲間於天馬山周氏見石刻
山舟二字迹類飛白甚奇古蓋趙承旨筆也亟手拓一本畀吳槎
客驚攜至杭州贈侍講任梁素未謀面自此遂訂交槎客賦長歌
以紀

乾隆甲戌夏 命翰林工楷書者梁國治秦大士莊培因梁同書

等繕錄昭明文選又命朱珪戈濤盧文弼翁方綱等校對於翰林院後堂東寶善亭內發出宋版文選一部紙墨精好古香襲人每冊有前賢手題墨蹟第一冊前有御筆題云此書在天祿琳瑯中亦不可多得

右紀聞陳康祺撰

古書名家皆有代筆蘇子瞻代筆丹陽人高述趙松雪代筆京口人郭天錫董華亭代筆門下士吳楚侯山舟學士書名譟海內而從無代筆湯畫人庶常錫蕃沈友三明經益頗肖公書嘗爲人作字署學士名實非代筆也

右兩般之雨庵隨筆梁紹王撰

葉酉

桐城葉先生諱酉字書山進士官左庶子著春秋究遺十六卷多宗其師靈皋方氏春秋通論而亦稍有從違其曰究遺者蓋用韓愈贈盧仝詩春秋三傳束高閣獨抱遺經究終始語也於胡傳苛刻之說及公穀附會之例芟除殆盡於左氏亦多所糾正乃往往併其事跡而疑之是未免於拘牽而大致準情度理得經意者爲多其凡例中所謂變例特文隱文缺文之說亦較諸家之例爲有條理統覈全書瑕固不掩其瑜也又撰有詩經拾遺十三卷

右學案唐鑑輯

按葉公乾隆四年進士



孫景烈

孫景烈字孟揚號酉峰武功人早歲舉於鄉爲商州教官勤於課
士不受諸生一錢雍正年間巡撫蒲坂崔公以賢良方正薦授六
品銜乾隆庚午陳文恭公撫陝奉旨舉經明行修之儒將以景
烈名入告先是景烈己未成進士明年授檢討以言事忤旨放
歸遂深自韜晦乃以賦性拘墟學術膚淺固辭主講關中書院蘭
山書院教生徒以克己復禮居平雖盛暑必肅衣冠韓城王文端
公爲入室弟子嘗語人曰先生冬不鑪夏不扇如邵康節學行如
薛文清又曰先生歸籍三十年雖不廢講學獨絕聲氣之交爲關
中學者宗有自來矣

右宋學淵源記江藩撰

按孫公著有酉麓山房
橐可園古今文諸集



蔡揚宗

劉元熙

楊理

陳夢元

劉校之

蔡揚宗字賡堂湖南湘潭人乾隆己未進士選庶吉士授編修擢
贊善由侍讀庶子升侍讀學士視學山西校士公明釐正文體所
拔多寒畯晉詹事府少詹事內艱歸遂不出同邑劉元熙字賓門
乾隆乙丑進士入翰林練達時務聲譽日起尋乞養歸篤友愛厚
宗族歲荒出穀麥各數百石濟里中饑又做行社倉法綜理周密
規畫井然著四香閣詩文集又同郡楊瑄字元音湘陰人雍正壬
子舉人零陵縣教諭與元熙同登進士選庶吉士工詩古文詞爲
大學士蔣溥所激賞嘗卽席賦梅花詩成都下傳誦著元音集陳
夢元字體齋攸縣人乾隆甲戌進士選庶吉士授檢討充三通館

纂修明習掌故勤學好問與諸城寶光龔大興朱筠桐城姚鼐休甯戴震輩相切劘得文章正傳平生辨義利嚴廉恥尤淡於進取林居二十年以著述自娛學者稱體齋先生有春江文集四卷詩集四卷杓橐二卷雙江別橐諸書劉校之字書堂長沙人乾隆辛巳進士選庶吉士授檢討典試浙江稱得人視學貴州以轉移士習爲己任歷官中允晉翰林院侍讀改戶部員外郎升郎中生平行己介而接物以謙處事不激不隨卒年六十

右傳李元度撰

邵齊燾

今海內人士所推能爲東京六朝初唐之文者無論識與不識必首稱吾友叔山叔山與同歲舉進士名能爲史漢若昌黎河東文者則有定興王君芥子芥子初亦好爲文如叔山及見叔山文歎爲天授遂輟不復作二君同年齒同官翰林同以文學相引重而又同以原官放歸田未幾芥子復起累遷至湖南觀察行大用而叔山則竟死矣觀察嘗遺書索刻其文將序以觀示後學叔山未及應卒明年其孤培德走使乞觀察銘其藏觀察曰序吾已生許之矣銘請他屬培德則又泣而請於文文與叔山交不後觀察乃序而銘之君姓邵氏名齊燾字荀慈叔山其號也先世在唐貞觀

間居杭之北市曰道宗無子以弟吏部侍郎說子好禮爲後凡十有三傳由杭而睦而歆至饒州都帥顏子萬成乃卜居休甯之黎陽又二十傳至鄉飲若水始遷崇熟常熟後分縣爲昭文遂著籍爲昭文人若水生君曾祖歲貢生庸齋 贈儒林郎庸齋生君祖附貢生莊庵莊庵生君考候補主事味間並 贈奉政大夫兵部武選司員外郎味間少孤能強毅自立遊義門何學士門受其學尤善書得二王法生五子君其第二子也生之夕夢明祭酒馮公夢禎以名刺來謁聞若願借居三十六年云寤而君生因名君小名曰開生三歲生母曹安人卒嫡母程太宜人撫之愛如出腹子甫受書輒了大義塾師驚辭不能師長而愈奮有聞於時其學於

古也涵而揉之去故遺迹咀含浸淫滲漉衍溢乃大昌於辭而惟自己出今古駢散殊體詭製道通爲一涉筆矢音金石咳唾造次以之允蹈維則班范潘陸斯文未墜君於 本朝一人而已乾隆壬戌第進士其闈中文騰輦下人皆口傳以熟後有效者輒得弋獲雖形貌乖舛羣相指爲邵體君聞之不以爲忤也君旣入詞館明年 駕幸翰林院錫宴傲柏梁聯句與焉尋獻 東巡頌原道數章研神播采揚班之亞也羣公器之爭欲致君門下顧君冲澹不省揣合相滄滄爲曠又習與一二靜者遊益耽間喜自弛置時多少年暴起意氣盛各以才力相鬪煽輿馬服御燕款相矜高雖謹厚貧者咸務此不若不得比人數而君族又有以貲雄者世故

誤指君為富人顧獨乘羸車攝敝衣冠傲然出眾中則大駭久之
 益落落無以自見乃自顏其齋曰道山祿隱在翰林十年充書局
 纂修者再充京兆分校者再兩遇廷試亦再屈遂罷歸時年三
 十六說者謂符昔夢云君通籍初遭母兄喪旋喪偶思親圖歸日
 夜以冀既歸得侍融融怡怡如其兒時退事著述益肆以醇間遇
 國家慶典臯賡禹謨踰洋廟堂假羽飾喙頡輝鸞鳳郵書屬草
 者使填於門負鼇蟠螭銘官揭阡人交走幣恐後咸須君文以休
 萬祀身晦名顯日逾以崇乙酉清蹕南巡有 詔徵在籍詞臣
 集試 闕下時文官京師或謂曰此舉亦在邵某也若與邵厚曷
 促之來文曰邵某病且母老恐不果來已而竟以疾辭不赴越四

年卒春秋五十有二君貌清古豐下銳上首微窪如仰釜眉目疎
 秀短視精草章入晉人室每據案書望之若隱几臥者嚴冬喜脫
 履擁鑪坐客至倉卒覓履不得隨取躡之履異旁觀竊視匿笑君
 覺之亦自笑已且復然終不以措意當金川之平也相國忠勇傳
 公旋師禮成坐朝房百官咸會君立門外面之取鏡諦視公呼入
 問曰若何視君微哂不荅徑趨出其意度夷曠類如此與之遊者
 未嘗見愠色即愠未嘗出聲氣性愛才喜獎借後進嘗主毘陵龍
 山書院君歿士有哀之若父母者君一兄三弟齊烈乙丑進士選
 為庶常卒於官齊熊舉人內閣中書舍人齊然齊烈同榜進士由
 庶常改官兵部武選司員外郎齊鼇貢生皆賢而有文者配席安

人太學生 贈文林郎永恂孫附貢生鎬女有高行先卒君已葬而銘之繼配王安人資政大夫戶部侍郎原祁孫通奉大夫巡撫廣東兵部侍郎暮女子三男二人培德聖增均縣學生聖增少負志節務矯厲不同俗以自標置先君一年卒女一人適太學生趙貴鯤孫男廣鎡廣衡孫女二乾隆己丑某月日將葬君於席安人之封培德余壻也使來速銘銘曰


斑斑之獸弗擾於囿噦噦其音於桑之林嗚呼叔山古誰不然而克以有於萬年維生不羸維後之成以鴻厥聲

右墓誌銘鄭虎文撰

邵叔山太史齊壽工東京六朝之文其玉芝堂集淵懿鎗洋鯨鏗春麗駢偶家奉為鴻寶太史温温不自許嘗用陳思王語僕嘗好人譏彈其文八字鐫諸小印即此見前輩之虚心

右紀聞陳康祺撰





姚範

道光辛卯安徽疆臣列君與君猶子故刑部郎中之行誼請祀鄉賢從人望也次年冬部臣勘覆以爲名實相副得報可時君之曾孫瑩宦遊江蘇以君遺集援鵝堂筆記三十四卷古文集五卷詩集七卷鄉賢錄一卷餉世臣而屬文君之墓石郎中君世所稱惜抱先生而君則惜抱軒集中所稱學所自出之伯父薑塢先生也憶世臣以嘉慶壬申謁惜抱先生於白門鍾山書院請爲學之要語及君者至再至三嗣讀古文辭類纂中載君論說數十百事披隙導窾辨正舛誤莫不持之有故則益欲求君書數年不可得茲得反覆之乃知君博覽強識不主家法唯以旁稽互證求一心

之是為詩文必達其意絕去依傍自成體勢居恆不著書而繙閱校勘至老不輟藏書數萬卷悉加朱墨見有錯謬羨脫隨手糾正各紀錄於簡端君既卒書籍頗有散失惜抱先生收手蹟之僅存者藏之及瑩成立乃舉以相付瑩逐條編纂其有前後持論差互者悉仍其故今所版行之筆記胥是物也然君集有書史記六國表序後曰世變異則治法隨之故漢以後多踵秦法司馬氏援法後王之說以學者不道秦事為耳食蓋深感世變而詭詞以寄痛則君蓋深有獲於古訓者非苟矜淹洽也固將有以用之迺覽舉至年四十一始通籍居詞館數年即膺察典當外擢方面遽引疾去夫豈忽於世事哉繼讀君跋顏氏家訓曰交道締結常為禍福

所倚伏文人志士於幕府權門貴判迹於首途避薰炙於始灼然則君之決退其亦有所不得已於中者也君既歸里無所用則相與率鄉人舉義倉條約甚設迄今幾百年踵其法而擴之以故邑屢饑而不害是亦為政君斯有所見端矣讀君之書可為學者稽古法迹君勇退無濡滯可為學者涉世法推君之任恤鄉黨可為學者入居里族出拊閭閻法則君之所以不朽固不係墓石之有無而稱述先達流風餘韻以諷諭方來斯固後死者所有責也爰次其世家而系之曰

君姓姚氏諱範字南青薑塢其號也世為安徽桐城人曾祖諱文然康熙中官刑部尚書謚端恪雍正中特旨賜專祠祀於其邑

祖諱士基湖北羅田縣知縣民思其政祀之於名宦祠父諱孔鏜
早世 贈翰林院編修君以康熙壬午八月十八日生戊戌補縣
學生員雍正乙卯選拔貢太學舉乾隆丙辰順天鄉試第二人中
式壬戌會試第三人成二甲進士改庶吉士甲子充順天鄉試同
考官乙丑散館授編修充武英殿經史館校刊官兼三禮館纂修
官丁內艱服闋起原官兼文獻通考館纂修官庚午京察一等既
引 見以病自免解組後教授南北閱二十有一年辛卯正月初
八日卒於家君卒逾六十年鄉人追慕教思籲請入祠而傳學之
惜抱先生實侍君入一門四世先後以政事文學享 國家俎豆
胥蠻之報史以所謂榮名豈有既者耶

右墓碑包世臣撰

雍正乾隆間桐城方靈臯侍郎負盛名海內顧於同邑畏二人焉
其一劉才甫其一則姚薑塢先生也才甫以其文而先生兼以學
重稱爲通儒先生諱範字南青薑塢其號世桐城人曾祖諱文然
刑部尚書祖諱士基羅田縣知縣考諱孔鏜邑增生以先生貴
贈翰林院編修康熙五十七年先生年十七補桐城縣學附生雍
正十三年充拔貢生乾隆元年丙辰 恩科順天鄉試中式舉人
七年壬戌會試中式進士改庶吉士九年甲子充順天鄉試同考
官十年乙丑授編修充武英殿經史校刊官兼三禮館纂修官丁
母夫人憂歸服闋補原官兼文獻通考館纂修官十五年庚午京

國朝詩林卷之二十一
察一等引 見後以病免歸遂不復仕嘗應直隸總督方恪敏公
之聘主問津書院前後凡八年三十六年正月初八日卒年七十
道光十二年十月崇祀鄉賢祠配某氏某官某女 封安人子五
人某某孫六人曾孫四人以乾隆某年月日葬長嶺山先生九歲
喪父哀毀如成人事祖母及母能盡孝父歿時弟淑甫四歲甚友
愛之性坦易接人以和然遇所不可介如也在翰林時同館錢塘
袁子才方年少有才名諸公貴人爭爲延譽子才欲先生贈之以
詩竟不可得居家之日有同年生爲桐城縣令先生屏跡自遠有
以洲地訟者懷千金求一言力卻之富家子欲其一過門爲重卒
不往先生博物洽聞如漢之劉向揚雄班彪固治詩古文皆以唐

人爲宗而立身行己一準則乎程朱鄉里後進咸師尊之然卒傳
其學者從子芻也先生之讀經史百氏有所見輒以蠅頭細書識
其簡端詞繁者用別紙籤書之或勸之著述笑而不應爾著九經
說采先生緒論閒入焉其後曾孫瑩悉哀集之爲經史子集筆記
四十六卷又援鶉堂詩七卷文六卷並刊行於世瑩以先生遺書
及崇祀鄉賢錄示其友人吳德旋屬爲文表先生之墓

右墓表吳德旋撰

薑塢先生諱範字南青國初名臣刑部尙書文然曾孫也少孤勵
學中乾隆七年進士授編修充武英殿經史館校刊官兼三禮館
文獻通考館纂修官十五年京察一等以病免歸主講席於問津

書院者八年三十一年正月八日卒年七十先生之學嚴於慎獨
宴處無情容出門無妄交任恤里黨視人猶己接物和易誘進後
學如恐不及眾流之學無不賅貫藏書數千卷丹黃徧焉有所論
正輒書之簡端多發前賢所未發或勸之著書笑而不言歿六十
年曾孫瑩編輯遺論爲援鷄堂筆記四十卷詩七卷文六卷惜抱
先生諱勗字姬傳薑塢先生弟淑之子乾隆二十八年進士以庶
常改禮部儀制司主事三十三年充山東副考官三十五年充湖
南副考官明年充會試同考官升刑部廣東司郎中充四庫全書
館纂修官尋乞病歸主講席於鍾山敬敷紫陽梅花各書院四十
餘年嘉慶二十年九月十三日卒年八十五桐城當康熙雍正間

方學士苞力講求古文義法天下始知宗尙歸氏熙甫以上追司
馬子長韓退之卓然爲古文導師劉上舍大櫬復繼起相應和天
下以爲古文之傳在桐城薑塢先生與善盡得學士緒論先生本
所聞於家庭師友間者而益充以浩博無涖之學養之以從容中
道之氣遂以自成一家爲後進典型病時俗舍程朱而宗漢以爲
枝之獵而去其根細之蒐而遺其鉅時時爲學者重言之故其修
道據德實允迪之品詣敦峻無纖毫類亦其文之所以粹美也所
著九經說十七卷文集二十卷詩集二十卷三傳補注三卷法帖
題跋二卷筆記四卷學者循是以求亦可以見先生體用之一焉
李兆洛曰君子所尙躬行而知行之難然後其心坦以謚其氣潛

以温其識宏以澹而其言自不得不訥凡為言者皆宜如是也而況讀聖賢之遺經尋求其義類以自抒其所得者哉明之時學者不能行程朱之言今之時不屑言程朱之言而并蔑程朱之行一襲取以為名一旁馳以求勝大抵不足於內焉耳薑塢先生淵詣極理而欲然不肖著書以自襮惜抱先生清明在躬蓄雲洩雨文章為光嶽於天下兩先生之躬行同也故不言文而其言立片語破惑單義樹鵠有若著蔡其發而為文則明晰黑白流示孚尹穆然和順於道德也讀先生遺書求得行事始末恨不得在弟子之列故私錄其槩時觀省焉

右傳李兆洛撰

按姚公所著卷數碑表傳不符或撰人所見本各異歟謹仍其舊

鄭虎文

公少孤竭力奉母母病禱於神請減算昇母事兄如父迎寡姊歸老於家撫諸姪諸甥五十年親戚故人待以養葬者無虛歲就食於其家者無虛日囊篋每空家人以告君笑曰姑强支持寒餓當其之吾甯苦身無以病吾心也性無苟取歲時餽遺非其人雖親舊不受

君一主河南鄉試三充順天鄉試同考官再充禮部會試同考官提督湖南廣東學政家居主徽之紫陽書院十年主杭之紫陽崇文兩書院五年

右王芥子文集張維屏錄

虎文由編修出典河南鄉試督湖南廣東學政歷左贊善歸主徽
杭書院於學靡不通衡文兼取眾長無遺美素以經濟自負嘗願
爲知縣謂縣令切近民易知民間疾苦一令賢則一縣治天下之
令賢則天下治人以爲名言

右嘉興府志符葆森錄

承光殿南乾隆十年建石亭以置元代玉甕按輟耕錄黑玉酒甕
玉有白章隨其形刻爲魚獸出沒波濤之狀其大可貯酒三十餘
石徑四尺五寸高二尺圍圓一丈五尺至元二年告成敕置廣寒
殿云其後屢易朝代廢置某道院中以爲醬甌有工部侍郎三和
者善博古物於道院見之因賤價贖以歸進 上仍置故處 純

皇御製玉甕歌以紀其事命廷臣賡和以鄭虎文之詩爲最其詞
曰天啟 聖瑞玉甕出惟 聖克受昭聲歌臣愚未覩法宮寶伏
讀 睿藻心爲摩甕廣三尺容五石隨形窅突浮圓荷刻劃類鑄
象鼎物長風蹴蹋萬里波腥涎怪物走蛟蜃呀呷睽瞍鼉鼉陽
冰不治陰火闐怪變滅沒吞江河伊誰鏟削運鬼斧或巨靈掌吳
剛柯吾思此玉當在璞碗然萬古藏嵯峨百靈孕含胚太極潤及
草木輝巖阿原爲聖役剖鑿出宛轉人世襲白窠那知德薄不能
有供玩耳目羞姘媵如延津劍泗水鼎神物終化理不譌於時恭
承 陛下聖萬方貢獻聲猗那人無遺賢物鮮棄希世寶冑終煙
蘿熊龍氣光燭夜乃迹而得歸搜羅轉 敕內府輸朽貫千金

易致駟馬馱陳之廣殿重圖訓奠如金甌無傾陂龍翔鳳翥發天
唱四十八人鳴相和嗚呼隱見會有遇委棄道院歲已多冬菹實
腹泥沒足學士憑弔資吟哦拂拭偶及光萬國經天不掩同義娥
甄幽拔隱寄深慨誰其會者空摩挲異物且貴況奇士努力明盛
無蹉跎

右錄宗室昭棟撰

按鄭公字炳也號城齋浙江秀水人乾隆七年進士著有春松閣集

黃遇隆 林學易

黃遇隆字介三湖南甯鄉人乾隆壬戌進士選庶吉士甲子分校
北闈稱得士以病歸潛心洛閩之書言論造次必於儒者雖盛暑
不去冠帶戊辰改知縣未任丁承重憂主講城南書院以道義爲
標準取程朱教人切要之旨以示曰力實際學者宗之家有食指
百餘不異爨癸酉謁選以疾卒於旅次後又有林學易字半霞衡
山人父鳳聲諸生邃於性理之學學易成乾隆甲戌進士九歲能
屬文未冠受知於學使夏之蓉吳嗣富均有國士之稱及入翰林
授檢討告假歸省連丁父及祖母憂遂不復出掌教石鼓蓮湖集
賢昭潭羣玉書院布衣蔬食足不入官府士林則之著羣玉書院

學說

右傳李元度撰



陳長鎮

乾隆十有四年冬十一月望後一日都城積雪深尺許薄莫庶常
 陳君宗五衝寒披齋戶告曰鎮辭家踰兩載憶老母恆廢眠食明
 當倍道歸以公稔悉此心也來者別詞氣甚摯次日使詞之則辨
 色已行矣未幾有傳其凶問者余方怛怛然泊胡編修中垣至言
 君緣曉夜冒雨雪行致疾近里門始知太君奄逝慟毀嘔血遂至
 不起今將葬以君季鈞所撰行述徵銘余南嚮哭之歎君之篤於
 天性必欲從親地下以成其志也余居京師數十年聞世所謂淹
 洽能文章慷慨負經世才者率薄於天性雅不欲近獨於君晤接
 頻數久而益不厭始君之以學使者舉優入都也鉅公要人耳其

名競欲羅致之君避弗往嘗語余曰鎮早失怙忍死日侍母氏覽昔人絕裾齧臂事輒面頰髮上指今茲之來母命疊迫故夙昔矢志獲讀書負米長依膝下於願畢矣世榮不以易也余媿其言既而薦鴻博登賢書不以爲喜兩屈於春官怡然遄歸若將終焉而太君期以祿養弗之許也會試期將屆復預趣之北上先是平郡王徧求洞達古今之士而難其人慕君文行卑辭厚幣敦請君以親老固辭至再三至是放牒後王多方得致太君諭以要之君不得已就焉不欲入朱邸王特葺別第館之時過從諮問禮滋恭君與言一依於忠孝常舉古賢詰懿行嘉言以證此外無片語他及王益加敬戊辰春應南宮試獲雋魁其房旋入翰林充內殿纂修

此士人榮遇而君邑邑終日念太君彌甚或當食長歎枕函常有淚痕頻欲歸王亦不能奪也會王遭疾數月薨坐是淹行期君貌甚悴鬢髮增白絲迨謁假得請馬首南指望雲行漸近羣度公得抽身歸子舍夙願克副今而後喜可知已曾不意其所值若此至於以身殉親冀償其未竟之志也悲夫君生有異徵太君夢吞月華考芷瀕先生復夢玉函從空墮標曰斯文大壯君手承之於仙庭三歲授書卽上口五歲能作韻語其警句往往傾倒耆宿家多藏書繙研殆徧說經折諸聖歷代史及諸子百氏悉攬其綱要而摘其疵瑕所爲古今文別裁僞體匯眾美成一家言故爲諸生時試輒冠曹偶尤長於詩始跨昌谷繼神明於少陵漫叟以上闕漢

魏卽率爾之作亦殊凡響練習政理垂髻贊厥考歷宰劇邑老吏
宿幕愧弗及祁陽陳冢宰撫皖時延之署中多所裨補 殿試對
策敷陳吏事侃切數千言歎服者非僅若李邵一人而已慎擇交
涇渭無少溷所與遊有面規無後言情恕理遣之事不可殫舉於
道義乎治者憂愉如一體有事惟力是視素無長物雖一面之識
告緩急必罄所有資之因是世或稱君爲通儒爲詞人或稱爲饒
經濟爲崇氣誼凡所品目皆君之餘事也君孝友至性纏緜固結
已推之爲諸父羣從之惇睦暨及於宗族鄉里之振援而其心猶
日以子職未盡皇皇如不自克此君之所以迥出時髦而余所以
與君久處而不厭者亦政在此不在彼而今已矣如斯人者可易

得哉君先世東甌始遷祖玉川以任子從戎楚南因家武陵高曾
多隱德考諱某由名孝廉宰某某縣政最需次部郎居鄉型俗當
官恤民鄉賢名宦兩祀之所稱芷瀕先生者也妣黎太君早逝生
某君伯兄王太君生君及季歲貢生長鈞君諱長鎮字宗五號延
溪乾隆戊午科舉人戊辰科二甲進士翰林院庶吉士充武英殿
纂修官生某年某月某日卒某年某月某日年若干歲配某氏子幾
某某出幼遺橐古今體詩駢體及雜錄評纂等共若干卷鈞檢而
輯之藏於家鈞亦好學工文詞某年某月某日葬君於某處銘曰
詞已出克掀於淖行晞古不襲諸貌名昌其身非所好至性過人
竟死於孝凡百可稱銘舉厥要

右墓誌銘彭維新撰



圖鎔布

圖鎔布字裕軒滿洲人乾隆戊辰進士改庶吉士散館授檢討累官翰林院侍講學士

八旗通志枝巢詩草四卷圖鎔布撰晚年卜居於阜城門外玉河鄉之池水邨有園圃竹木之勝春秋佳日逍遙其間故得詩最多而詩境亦愈進也四集共詩五百十四首枝巢云者蓋取鷓鴣巢林不過一枝之意因以顏其集卒之明年乾隆丙午其門人御史劉湄爲授梓大興朱珪爲之序

朱珪序云裕軒不求工於詩顧其胸次素潔遇境發抒往往有真意其尤近道而可傳者晚年之作高者偈陶韋次者落落卽事言

景亦北宋之音也

任大椿序云余不及見先生居官時顧聞劉文正公之言曰圖學士不忽於微不愆於隱儒者之幹也所居室隅有地十餘畝曰漫圃惟植桑麻及松韭或勸之蒔花樹曰桑麻資生花樹悅目安能以悅目之故而曠資生之地哉乙巳秋以疾移往邨舍舍之旁卽所營生壙也疾漸篤家人請輿歸則曰吾已歸吾宅矣復安歸耶遺命歿後有弔吾墓者薦寒泉而已勿以葷酒拂吾意

右 熙朝雅頌集鐵保錄

吳鴻

杭州吳修撰鴻視學湖南壬午科典試者爲嘉定錢竹汀大昕韓城王偉人杰三公皆衡文巨眼也諸生出闈後各以闈卷呈吳吳所最賞者丁牲丁正心張德安石鴻翥陳聖清五人曰此五卷失一吾此後不復論文矣榜發之日吳使人走探俄而鈔榜來自第六名僅有陳聖清一人吳旁皇莫釋未幾五魁報至則四生已各冠其經矣吳大喜一時傳爲佳話

右記余金撰

按吳公乾隆十六年一甲一名進士

國朝耆獻類徵初編卷百二十六補錄

詞臣十二

蔣拭之

先舅蓼厓先生姓蔣氏諱拭之字季眉浙之甯波府鄞縣人也蔣氏在甯有三宗其一爲宋金紫光祿大夫浚明之裔自天台遷奉化再徙於鄞其一爲宋尙書學士猷之裔自丹陽遷其一爲宋元祐黨人之奇諸子之裔今慈水鳴鶴場之蔣也而先生之所出自諸暨乃宋給事中邦彥之後明初始遷鄞外曾大父諱維衛外大父諱芬皆以先生貴贈如其官先生世爲清門以讀書敦行模範學序顧累代隱德弗曜曾大父以祭酒有名諸生早世先生祇四

歲先太孺人祇二歲家無負郭之產外大母以女紅上奉耄舅下
 撫穉孤凡十有五年而先生學行有成太孺人亦稱淑女人以為
 苦節之報吏部侍郎滄柱仇公一見先生以畏友待之先生少為
 舉子業所至輒冠其軍因戲為人代筆其三人皆第一其一人第
 二遂以此獲譴於學使者曲阜顏公然顏公惜其才雖以功令襖
 巾服而次年又召之試復冠其軍先生亦遂以此愈得名十室之
 邑五尺之童莫不傳其制舉文字以為津梁顧先生所擅長者其
 實不在此特兔園中以此為先生重耳先生詩極似香山大傳查
 田先生一見而心折焉古文頗近張文潛儷語亦得涪溪一輩家
 法顧先生皆不肯輕作乃踴躍於場屋年幾五十始見貢於布政

司公車累上復不得售有巨公方主文柄招先生往一見欲以關
 節授之先生謝不往曰世豈無張文隱公余文敏公其人者二公
 者前明嘉靖中暗搜震川之考官也又十餘年始見中於禮部選
 入中祕逾年 詔歸選司補外先生亦無意於功名之事浩然而
 歸家居三年而卒得年七十有一初娶柴氏再娶裴氏晚娶董氏
 子四女四孫女三葬於城西之浮石先生為人坦率樂易不立標
 格不設城府然有所不合未嘗詭隨分巡甯紹台道王某市井人
 也嘗延先生課子力辭不獲勉就之解館而後絕不復往還性最
 孝外大母病自藥餌以至廁牘無不身親寡孀無後事之與所生
 同羣從兄弟友愛一體友朋患難傾束脩所入以助之故授徒幾

五十年羔雁稠疊然隨手而盡歿之日諸子無以為斂其可哀也予之少也最為先生所喜稍長而倔強不甚帥教先生頗有不釋然於中者嘗與先太孺人微及之先太孺人笑曰黃山谷之諸甥無不稟其詩法而徐師川獨不謂然其水濱濠上之荅可謂妄矣山谷之詩豈師川所能及然而師川亦自有其可傳者李空同晚年家居大為其甥曹仲禮所苦亦不以此損空同也兄其休矣先生為之引滿而去及予追隨三館又同被左遷或曰當事者惡子因以及先生乃予歸甫一歲游丁內外艱方仗庇先生視予猶子或垂憐茶苦而先生又逝棘人樂樂其又何以自存耶中表諸弟以穿中之柱徵文爰再拜而志之

右穿中柱文全祖望撰



國朝耆獻類徵初編卷百二十六補錄

詞臣十二

杭世駿

太史名世駿字大宗又字堇浦家貧力學假書於人窮晝夜讀之
 父母禁止輒篝燈帳中默誦與孫銀臺灝陳太僕兆崙梁編修啟
 心相國文莊嚴進士在昌翰林璠昆仲等為友五日一相聚互為
 主客問難以多聞見者勝太史尤強記同輩推服雍正癸卯舉孝
 廉受聘為福建同考官 高廟初元 召試博學鴻詞列一等第
 五授翰林院編修校勘武英殿十三經二十四史纂修三禮義疏
 國子監嘗有公事羣官皆會方侍郎苞以經學自負諸人多所諮

決侍郎每下己意太史至徵引經史大義蠶發泉涌侍郎無以對
忿然曰有大名公在此何用僕爲遽登車去太史大笑而罷其盛
氣不肖下人如此歸田後主講粵東粵秀書院刻嶺南集詩風骨
適上最爲當時所稱以比騰笑慎旃兩集其後主講揚州最久愈
負海內重望馳書幣求文之使日至請益者恆滿座有先達以經
說相質一覽曰某事見某書某說見某集拾唾何爲乎學子有欲
奉教者太史問其所業以一經對則以經詰之復以一史對又以
史詰之皆窮乃曰某於西晉末十六國事差能詳耳復詰曰汝知
是時有慕容垂乎垂長若干尺得年幾何其人慚沮太史生康熙
三十五年卒於乾隆三十七年生平勤力著述所撰石經考異榕

城詩話三國志補注諸史然疑詞科掌錄文選課虛漢書蒙拾續
方言道古堂詩文集已行世鴻詞所業補晉書傳贊經史質疑史
記考異漢書疏證禮例續禮記集說兩浙經籍志續經籍考皆具
草槩惟晚年欲補金史嘗構亭曰補史亭其書未嘗見也太史於
詩用功深嘗曰吾遇杜韓當北面若東坡則兄事之每呼曰蘇大
哥於同時人獨心折厲孝廉鶚然太史體醇氣健造句雄放孝廉
不逮也與丁隱士泓爲親家每論議古人必推案交詬乃已太史
之歸也聞諸前輩云是時亢旱 詔舉直言極諫徐文穆公以太

史應 詔太史遂上疏言部臣自尙書至主事皆滿漢並列請外
省自督撫至州縣亦如此所言紕繆不中理 帝震怒欲置之法

文穆悉力營救叩首額盡腫乃得斥歸後迎 駕湖上 賜復原
官太史既無傳狀弗能詳也 高廟巡幸塞外嘗天雨新霽馬上
吟迎風輦露清於染過兩山痕澹入詩二句顧謂從臣曰此杭世
駿詩惜其沒福耳後有御史祝德麟疑太史不得意或有誹訕訐
奏之 九重披覽以並無違礙聽其流傳 朝廷愛才之盛心大
矣遠矣丙辰鴻博諸公才皆出太史下諸公多至顯仕太史獨淪
落以終而著撰之富卒亦無逾太史者太史遺書未刻者尙夥賓
仁既歿往往散落人間云

右別傳許宗彥撰

杭檢討名世駿錢塘人少舉於鄉乾隆元年以鴻博科官翰林院

檢討先生性伉爽能面責人過同官皆嚴憚之乾隆中葉 上思
得直言及通達治體者特設陽城馬周科試翰林等官先生與焉
日未中已得數千言語過懸直末又言滿洲人官督撫者過多觸
純皇帝怒抵其卷於地者再已復取視之時先生試畢意得甚方
趨同官寓邸食忽內傳片紙出言罪且不測同官恐促先生急歸
先生笑曰卽罪當伏法有都市在必不污君一片地也何恐尋得
旨放歸先生家故不豐以授徒自給主揚州安定書院者幾十年
以實學課士子暇卽閉戶著書不與外事又疏懶甚或頻月不衣
冠性願嗜錢每館俸所入必選官版之大者以索貫之積牀下或
至尺許其么麼破碎及私鑄者方以市物兩手非墨污卽銅綠盈

寸然先生雖若有錢癖嘗見一商人獲罪讎使非先生莫能解夜半走先生所乞救並置重金案上先生擲出之不顧最不喜讀邸報里居二十年同歲生或積官至大學士尚書總督先生不知也歲戊子劉文定綸適娘閣特旨以吏部尚書協辦大學士內召過揚州訪先生先生見其冠服詫曰汝今何官曰不敢欺參預閣務者已數年矣先生謔之曰汝吳下少年耳亦入閣辦事耶闕堂笑乃別余年未二十省從叔邗溝始識先生先生見所擬樂府及古賦奇賞之畱語數日曰汝後必入翰林不可不知掌故因日舉翰林故事十數則告之及余入翰林而先生所言規制已大半不可行蓋不及三十年風氣之變如此先生一歲必兩歸錢唐歸後

無事或攜錢數百與里中少年博左近望僊橋下時吾鄉錢文敏維城視學浙中詞館後進也一日盛暑張蓋往訪先生頭踡過橋下文敏已從輿中望見先生短葛衣持蕉扇與諸少年博正酣文敏即出輿揖曰前輩在此乎時先生以扇自障業知不可換即回面語曰汝已見我耶文敏曰正詣宅謁前輩耳曰吾屋舍甚隘不足容從者文敏固欲前先生固卻之始尋道反文敏去諸少年其博者始從橋下出驚問曰汝何人學使見敬若此曰此我衙門中後輩耳遂不告姓名去書至此客適有過訪者見而笑曰不修邊幅與博徒戲若此尙足記耶余曰誠如若言然以視士大夫罷間後日飭章服出入官廨干預公事並修飾輿馬僕從者以檢討視

之不尙勝耶客尋思之曰是當記是當記

右書事洪亮吉撰

仁和杭先生世駿官翰林院編修著續方言二卷采十三經注疏說文釋名諸書以補揚雄方言之遺前後類次一依爾雅但不標明其目耳蒐羅古義頗有裨於訓詁惟是所引之書往往耳目之前有顯然遺漏者而大致引據與覈在近時小學家猶最有根柢者矣

右學家唐鑑輯

先生博聞強記口如懸河袁簡齋輓先生詩有云橫衝一世談天口生就千秋數典才蓋紀實也

右聽松廬詩話張維屏撰

杭大宗自謂吾經學不如吳東壁史學不如全謝山詩學不如厲樊榭齊次風侍郎特愛杭作淹博嘗集蘇詩及大宗詩句爲一卷題其籤曰蘇杭集句

右梧門詩話法式善撰

大宗先生入翰林未久卽以言事罷歸沈文愨深惜其遇故以鄰翁旣雨談牆築新婦初婚議竈炊之句送之先生後人零落無存其道古堂集爲山舟先生刊以行世

右寄心齋詩話符葆森撰

葦浦編修首唱方鏡詩二十四首傳誦輦下和者自王侯以逮公

國朝耆獻類徵初編卷百二十六補錄 五
卿士大夫方外閨秀無不有作幾及數千家誠輦下僅事也

右蓮坡詩話查爲仁撰



國朝耆獻類徵初編卷百二十六補錄

詞臣十二

陳夢元

陳夢元字涵一又字體齋自少好學深思孤沈迥造乾隆癸酉與
星沙余存吾受知房考雩都管公臥村管公得試卷詫爲嘉魚替
人甲戌聯捷踰年歸養折節雲陽先正探墨香閣之藏辛巳散館
授檢討先後居官十載供職外惟顛顛服習與寶東臬姚姬傳諸
名宿相討論絕不以馳逐聲華銷鑠才具最後交休甯戴吉士東
原東原與同年月生呼之爲兄體齋勤於許叔重之解字鄭康成
之詁經與東原符契東原著述等身其原善三卷孟子私淑五卷

恆寶蓄之數以示體齋兩人相砥莫逆也乙未南還東原作序贈
行悉知己之言居林下廿餘載講席孤鐙淒神琢骨觀書多日見
所不足記問詳日砭所爲非古文詞凡數變觀東原所云心細悟
生無訐語無俊氣可知制藝亦數變觀東臯所云渾渾流出雕琢
鋤耘俱化可知晚自訂春江古文四卷詩賦五卷制藝七十首矜
貴簡檢不冒一豪率意鹵莽曩所刊杓橐諸編淘汰無存由壯歲
至垂老夙夜矻矻辨別欺慊求古人爲己之學以溫故知新經明
而行修於是乎爲庶幾焉

論曰吾攸陳桃文先生有起衰之功於楚越數十載而體齋繼之
是攸之儒者可僂指也楚南自雲陽彭石源先正以博洽震都下
而曠岫屢羅慎齋繼之體齋與余存吾又繼之是楚南之儒者可
僂指也名山之藏殆不偶然爰約論之以俟知言者

右傳文自炳撰





國朝耆獻類徵初編卷百二十六補錄

詞臣十二

姚範

姚範安徽桐城人乾隆七年進士改翰林院庶吉士十年散館授編修九年充順天鄉試同考官充三禮館纂修官歸卒於里範之學沈究遺經綜括精粹每讀書輒著所見於卷端經史子集丹黃雜下詞繁者裁短幅紙書之無慮數千百條從子刑部郎中鼐嘗欲輯之為援鶉堂筆記先載數則於經說中其儀禮首條及論語奧竈說四飯說是也

右 國史館本傳





70012712



國朝子史類行不系
卷一百二十一

